



第十四



五三

伍二

隆慶元年至三年



國權

鹽官談遷孺木著

穆宗契天隆道淵懿寬仁顯文光武純德弘孝莊皇帝諱載坫
世宗第三子母康妃杜氏嘉靖十六年正月癸卯生周菁列
晬盤取龍旗印石奇愛之己亥二月朔同莊敬太子景王受
冊封裕王是日卿雲見莊敬冊寶誤致於王世宗聞之曰
天命也癸丑婚李氏繼陳氏既景王薨世宗雖諱立儲人
心攸屬嘗議內禪不果丙寅十二月庚子世宗工賓裕
王入喪治

辛丑頒遺詔嚴京城守衛

戊申禮部左侍郎潘晟工部右侍郎徐綱詣永陵

夜京師地震

壬子 工即皇帝位詔曰惟我 祖宗聖、相承至治鴻功
超越千古暨我 皇考大行皇帝以經文緯武之德建安內
攘外之勲增光先朝垂庇後世方幸永賴遽爾上賓特屢馮
几之言屬以神器之重朕竢、在疚本不忍聞而文武群臣
下及耆老軍民合詞勸進至於再三辭拒弗獲乃遵遺詔以
是月二十六日祇告天地宗廟社稷即皇帝位明年為隆慶

元年仰惟末命之昭垂深望繼述之兼善悅焉自省豈所能
勝然而先志不可不成聖訓不敢不奉是用推類以盡義通
變以宜期衍舊恩通弘新化所有合行事宜條列於後云云
於戲覲耿光而揚大烈方勉盡於孝思贊帝軌而翊皇猷實
有資於忠蓋凡爾有位尚體朕心各摠匡輔之誠共保昌熙
之祚

正德十六年四月以後終嘉靖建言得罪諸臣遵遺詔召用
卹錄方士生金陶倣申世文劉文彬高守忠陶世恩俱下錦
衣獄唐秩章冕等為民餘受太常寺官及真人高士盡革去

齋醮之所下禮部議處工部料價等竹木等南京內府各衙門段匹器皿香蠟柴炭匠役等光祿寺品物酒飯等但因齋醮工作加派者俱停革織造採買等項除陝西織絨河南廣東織葛廣東採珠買黃白蠟降真香及福建買龍涎香南雲採寶石採礦金江西陶器并各處採芝悉停止其浙直織造內臣俱即回京隆慶元年漕米特折十之三餘起存本折特免十之五嘉靖四十四年以前兵部牧馬草場子粒牧馬匹虧課工部羅段紬絹麻鈇魚鰓翎毛皮張天鵝筋角漆料白榜紙砍柴木炭檯柴等銀及二郊銀如逋欠盡蠲之餘如常

釋戶部主事海瑞獄

甲寅改造隆慶大統曆

丙辰禘太廟罷內殿之祭

丁卯隆慶元年

正月己朔免朝賀封奏如常儀故事正旦決旬不奏事通政司以新政請

桂陽州藍山縣大水

戊午御宣治門群臣奉慰

葬常嬪高氏王氏

議大行皇帝謚

已未議生母榮淑康妃杜氏謚

庚申大理寺左少卿鄒應龍為太僕寺卿

辛酉吏科都給事中胡應嘉等言喪禮稍暇每朝罷必御文
華殿令輔臣面議裁決事屬六部則召對諸卿義常問難則
顧問儒臣又前代宰相入閣議事必諫官隨之國朝六科輪
直亦其遺意乞此後更番隨入聽面折是非或退而叅論
上是之

錄建言得罪諸臣通政使樊深都給事中丘樞楊思忠尹相

魏良弼李用敬左給事中陳瓚給事中吳時來周怡沈東顧
存仁趙軌張選袁世榮御史何維柏趙錦張登高黃正色方
新張檣凌儒申仲王時舉馮恩郎中徐學詩周冕主事張獅
董傳策劉世龍唐樞大理寺正母純德是日補瓚時來吏科
軌禮科世榮兵科儒登高浙江道新江西道檣湖廣道錦維
柏河南道仲山東道時舉山西道獅傳策刑部餘需次
吏部請卹諸臣第為三等一僇死若兵部員外郎楊繼盛左
中允郭希顏錦衣衛經歷沈鍊給事中楊允繩宜贈廕諭祭
一杖死若太僕卿楊最編修王思給事中薛宗鑑何光裕裴

紹張原御史浦銳曾礪業經主事周天佐作瑜臧應奎殷承
叙宜復官贈廕一譴死若侍郎唐胄都御史李璋學士豐熙
脩撰楊慎編修楊名檢討王元正贊善羅洪先大理左少卿
徐文華都給事中張翀張侃劉濟劉琦御史馬錄程啟元盧
瓊陳讓桑喬包節王宗茂余翺方一桂員外郎劉魁郎中余
寬黃待顯陶滋相世芳王與齡僉事章鑰宜復秩贈官吏部
尚書熊浹諫止箕仙御史楊爵彈擊權倖當與杖死同卹從
之贈浹少保謚恭肅

王世貞曰嘉靖遺詔卹錄言事得罪諸臣雖倣改元詔旨
最為收拾人心機括惜乎吏部奉行之臣未諳典故故倉
卒奏請不能無舛如熊太宰之加少保少保三孤也非部
所宜定議也此一舛也得罪諸臣當酌其事理之切直心
之赤誠與否而後劑之今但以得禍輕重為主致郭豐城
之卹反優於楊富平此二舛也翰林春坊自有本等階級
可贈今於贊善修撰皆光祿少卿是外之也此三舛也都
給事御史止贈通參大理丞其有遺悞而撫按題請者超
三級為太常少卿致仕官亦如之此四舛也自後言官所
舉尤為挂漏如石文介瑤少保致仕而稱太子太保彭襄

毅澤致仕加少保而亦稱太子太保故復贈少保林貞肅
俊致仕加太子太保而止稱刑部尚書故復贈太子太保
今獨林公改正而已楊文忠一品十二年滿加太傅固辭
而止又與蔣文定俱封伯亦固辭而止楊不當僅加太保
蔣不當僅加少師此則執政之悞也

癸亥詹事府吏部左侍郎陳以勤工謹始十事定志保位畏
天法祖愛民崇儉攬權用人接下聽言 上嘉納之

丙寅 工御宣治門視事

脩永陵勅內官監太監王鼎工部右侍郎徐綱

奪工部尚書徐果及其子錦衣指揮文燦官

丙子南京禮部尚書葛子禮為戶部尚書起郭宗鼎刑部右
侍郎樊深通政使

丁丑上 孝恪淵純慈懿恭順贊天開聖皇太后尊謚康妃杜氏

戶科給事中張憲臣工科都給事中王元春吏部郎中余敬
中為浙江江西廣西右叅政編修李貴御史李廷龍為四川
河南副使

前刑部侍郎鄔懋卿匿嚴氏戍邊

追奪故真人邵元節陶仲文官誥籍其家

撤西苑諸宮殿額初議盡毀之禮部惜其費僅去額
已卯萬壽節免朝賀

辛巳吏科都給事中胡應嘉削籍應嘉劾吏部尚書楊博考
察失公私憤謫給事中鄭欽御史胡維新閣臣郭朴以應嘉
佐察復撓察典越法重擬而應嘉前劾高拱俱疑出拱意於
是兵科給事中歐陽一敬等論救侵拱徐階薄擬應嘉謫外
拱疑階之嫉一敬也隙滋甚然應嘉傾險善訐士論輕之

談遷曰 上甫即位遽譴言路何以杜將來之口安陽不
解事其右新鄭適所以喙之也華亭元宰初不出一語陰

餌拱於叢棘之上誠智老而獨矣

壬午翰林侍讀學士張居正為禮部右侍郎兼學士洗馬兼
侍講殷士儋為侍讀學士署院

兵部主事海瑞為尚賢司丞南京通政司右通政鄭世威為
右僉都御史

甲申命齊庶人於南京禮部注籍減給婚娶

丙戌言官拾遺南京刑部尚書錢邦彥右僉都御史劉秉仁
吏部郎中劉孝仍任調南京太常少卿吳遵工部左侍郎張
守直南京工部右侍郎汪鏜太常寺少卿羅良

賜叔祖慶王三百金紵絲紗羅各十五端錦三端鈔二萬貫
叔楚連岷韓滂襄益衡諸王金鈔如之紵羅紗各十端弟晉
魯蜀代淮德榮諸王各二百金錦紵羅鈔同上姪周荆崇
吉姪孫趙王管秦府事隆德王敬鎔管唐府事庶長子碩曠
同工靖江王亦如之
除籓邸莊田加稅

二朔子 上祭太社太稷徹樂初太常寺請遣官禮部言禮三
年之喪至大祀越紼從事不敢卑廢尊也宜躬祭樂設而不
作

庚寅外戚錦衣衛指揮僉事杜繼宗封慶都伯正千戶李銘
德平伯副千戶陳景行同安伯各祿千石

辛卯大理寺丞唐繼祿為右少卿福建左布政鍾卿為光祿
寺卿

命遼東總兵官移遼陽使海州瀋陽之授冰解還廣寧防土
蠻

壬辰罷金海神之祭

故刑部尚書鄭曉贈太子少保謚端簡

巡撫雲南兵部尚書兼右都御史呂光洵為南京工部尚書

申維岳為署都督僉事總兵官鎮守陝西
癸巳定朝儀自翰林科道鴻臚尚寶如近例餘叙資品
襄王厚頰薨謚曰莊

甲午起林雲同刑部左侍郎

魏尚純為工部左侍郎林潤為太常寺少卿提督四夷館周
怡為南京太常寺少卿

命中外歲盤錢糧專於巡按不會巡撫其五年京盤并入歲
盤專勅各邊巡按御史

乙未立 皇后陳氏

登極恩徐階子中書舍人瑛進尚寶少卿李春芳郭朴並少
保舊講官高拱進少保兼太子太保武英殿大學士陳以勤
為禮部尚書兼文淵閣大學士張居正為吏部左侍郎兼東
閣大學士並直閣殷士儋為禮部右侍郎

釋故四川按察僉事趙祖鵬獄祖鵬里居被訐奏所作詩訛
工及僭橫不法論死

丙申順天府丞李邦義為南京鴻臚寺卿

丁酉雲南左布政陳紹儒為順天府尹

議錢法馬政戶部言禁偽錢餘舊錢聽民間兼行其稅課等

准收錢兵部言災傷郡縣每馬折八金五年審牧並從之先是太僕寺少卿武金請去種馬可得金百二十萬許之初種馬北七萬南三萬歲五萬京解其一給各軍後寄牧順天屬縣曰寄養山西陝西又設苑監官牧上苑萬匹中苑七千匹下苑四千匹陝西茶馬司沅河西寧等衛番族給金牌四十一納馬萬四千五十一匹曰差發給茶百萬斤取於蜀後金牌制廢止給茶易馬似立市云

何喬遠曰馬之始有政也其如夏人之助乎為我養馬駒餘駒畀馬戶所謂出其力以助耕公田所以宣德正統之

間馬養而至於山東河南皆馬駒也馬而不能孳生孳生而不能駒、而不能成馬是害馬而已矣害馬者不樂養馬者也間謂其人為我養馬者也而股削之繩束之不馬矣謂其所受地廣也而割其餘以賦他民其牧地不廣不馬矣死而責之償、而值過當不馬矣皇親貂璫之家請牧地則與之不馬矣故曰害馬者不樂養馬者也王濟武金之賣種馬也猶乎葉淇之賣鹽也不曙其大而徒以多金為功夫國初之有馬也不金而多駒也今也以馬價之金還出之畿內之州縣鬻馬以備邊價須三十金所鬻之

馬不直數金也此何取賣種馬而多金者也夫金也者人
之情也一見而侵漁生焉始也見駒而不見金其既也駒
多而金多惜乎如菜實之不待其熟也魚之不待其尺也
鬻種馬之謂也

戊戌福建左布政陳用賓為右副都御史巡撫雲南

右副都御史李一瀚予告

加恩藩邸官較及內臣太監黃錦詹錦衣指揮僉事錦衣衛
太保兼太子太保左都督朱希孝進兼太子太傅餘陞賞有
差

己亥故延綏副總兵黃演贈都督同知小芹河戰沒

庚子鄭大經張齊王之垣李貞元莊國禎胡禔為給事中張
應治徐尚為南京戶兵科給事中

辛丑上 孝潔恭懿慈睿安莊相天翔聖肅皇后 孝烈端

順敏惠恭誠祗天翔聖皇后尊謚加恩內臣黃錦詹錦衣指
揮僉事王本馮保詹正千戶胡明喬胡憲百戶餘有差下
徐果獄太監李芳劾其修蘆溝橋侵費也竟追戍

壬寅禮科給事中辛自修為太僕寺少卿

癸卯大賚廷臣吏卒父老

曹邦輔為左副都御史吳百朋為大理寺卿

趙岢總兵鎮延綏郭琥降大同副總兵

甲辰加謚元妃李氏孝懿皇后

定 孝潔皇后祔 世宗廟別祀 孝烈皇后於景雲殿改

曰弘孝

汰內府役匠濫官時太僕少卿二苑馬卿二布政司叅議二

郎中一員外郎三餘鴻臚寺丞光祿署正等銜至百數內官

監太監李芳請裁革下吏部斥減有差

察免工部主事劉子延奏辨編置塞下

乙巳加謚皇子翊鉞為獻懷太子翊鎰靖懷王皇女追封蓬

萊公主太和公主

罷玉芝宮歲祀仍日膳從禮部議視南京奉先殿也然 睿

皇帝與 高廟稍異即日膳猶贖

前刑部郎中徐學詩為南京通政司右叅議

遼東總兵官王治道敗於白雲山

丙午新寧伯譚功承卒

起趙貞吉吏部左侍郎兼翰林學士署庶事府

戊申減內府歲供米麥麻菽丹礬銅蠟等類

壬子故御史曾獅子綬入太學卿劾尚書汪鋹被杖死
乙卯中宮千秋節免命嬪賀

三丁月己安御伯張鉉署前府

翰林院庶吉士陳經邦陳懿德周子義戴洵為編修張秩許
國林偕春高啟愚陳思育成憲沈鯉沈淵為檢討李存文陳
行健管大勳嚴用和韓楫王璽為給事中王嘉言麻永吉楊
一桂吳學詩王湘李良臣楊允中鍾繼英為監察御史

夜木星逆行守亢宿

己未南京太常寺卿郭汝霖自免

庚申南京禮部尚書林虔機致仕

辛酉脩乾清坤寧宮

降雲南提學僉事萬廷言二級調外廷言科給事中周世選
劾工部尚書雷禮私忿中傷光祿寺丞廷言外補禮部
部覆廷言主事不五年陞光祿丞出之雲南猶為儒臣禮安
得與從之

裁內官監屬增給從太監李芳之請

甲子禮科左給事中王治工四事曰宗廟之禮 獻皇帝嘗

北面事 武宗今位 武宗之右揆之古典終為未合且祔

太廟千萬歲後不免通遷若專祀世廟則億萬世不改曰朝講曰親輔弼曰謹燕居 上是之

乙丑吏科給事中鄭大經兵科給事中張齊刑科給事中曹當勉工科右給事中王謨各勞邊

己巳太僕寺少卿李邦珍為南京通政司右通政

庚午鑄查刷光祿寺及湖廣江西山東河南直隸上江江北

監兌主事之章

直隸提學御史耿定向奏科場主考宜簡學行不論年資分考取卷正備俟裁文限字六百提學官驗硃墨解部監生編

號同諸生從之

復貢士坊費嘉靖三十七年減助餉至是浙江巡按御史王得春言之

大理寺卿吳百朋為兵部右侍郎兼右僉都御史仍提督軍務巡撫南贛勅岑因盜

壬申 世宗葬永陵祔 孝潔孝恪皇后

癸酉戶科都給事中徐公遴為太僕寺少卿

貴州宣慰司土舍安國亨貢馬

定大臣謝疏初南京戶部尚書馬森奏謝因命禮部酌例議

廷臣值大慶及令節止稱賀餘陞賚俱廷謝外官如常儀督
撫陞賚許踈謝

乙亥故南京兵部尚書李遂贈太子少保予祭塋
監察御史王得春上四事清宮闡禁諂慎題覆嚴貢選從
之

丙子鑄日本等國雲南各宣慰司金牌信符

丁丑 世宗祔太廟司 孝潔肅皇后

戊寅署太常寺事禮部 侍郎師宗記降少卿太常寺少卿
魏學詔袁好禮降寺丞皆羽涿濫躐自是限用科目

己卯 上御皇極門復常儀

庚辰祀 孝恪皇太后於神霄殿祔 孝懿皇后

大學士徐階等請開經筵許之

辛巳南京太常寺少卿周怡改北

壬午冊貴妃李氏賢妃汪氏

毀紫極殿紫宸宮改建翔鳳樓尋閣臣言官力止之

吏部左侍郎吳嶽為南京禮部尚書太僕寺卿鄒應龍為太
常寺卿南京刑部右侍郎徐陟疾免

甲申脩 世宗實錄勅太師成國公朱希忠監修少師大學

士徐階少保大學士李春芳郭朴高拱大學士陳以勤張居
正總裁禮部尚書高儀詹事府吏部左侍郎趙貞吉吏部右
侍郎陸樹聲署院禮部左侍郎潘晟右侍郎殷士儋副之左
諭德兼侍讀姜金和等纂脩

乙酉諭開經筵日講

故刑部左侍郎安福劉玉贈尚書予祭塋謚端毅

犯遼陽長安堡指揮王承德戰沒贈都指揮使指揮宋世
舉都指揮高惟忠及副總兵楊四畏下巡按御史訊之

四丙戌朔享太廟定西侯蔣祐等百五十餘人不至奪月俸

河南道監察御史陳聯芳上五事資輔弼之益時御使
諫之實重詔令之施慎爵賞之權近日傳奉世復執奏之規
報聞襲官概罷

丁亥戎政兵部左侍郎王本固改吏部

己丑南京吏科給事中岑用賓湖廣道御史尹校等拾遺刺
及大學士高拱閣臣例無拾遺 上切責之南京刑部尚書

錢邦彥工部尚書呂光洵劾免

京山王勤炫內江王承燾稷山王胤柯薨

庚寅南京吏部右侍郎瞿景淳為禮部左侍郎湖廣左布政

使畢鐸為太僕寺卿
兵科都給事中歐陽一敬再劾高拱專擅國柄亟宜斥上
以拱舊講臣不聽

辛卯南贛巡撫吳百朋奏高砂盜求撫許之

癸巳勅太師成國公朱希忠少師大學士徐階知經筵事少
保大學士李春芳郭朴高拱大學士陳以勤張居正同知經
筵

南京廣東道監察御史李復聘等劾高拱切責之拱失徐階
意嘗會食拱曰公在先朝草青詞媚上宮車甫宴駕而即

背之今又結言路必逐舊邸臣何也階荅曰言路口故多我
安能盡結而攻足下且足下獨不能結之耶我非背先帝
欲收人心使恩自先帝出青詞固我罪獨不記在禮部時

先帝密札問我拱有跡願得效力於醮事可許否此札今
尚在拱乃媿沮

丙申禮部言郊廟諸祭太常寺止奏日不奏時故陪祀多失
期今後日時並奏從之

起劉采南京工部尚書趙大佑刑部右侍郎改郭宗臯兵部
右侍郎協理戎政提督操江右僉都御史盛汝謙為大理寺

卿

兵部尚書趙炳然致仕

庚子傳制封臨川王恬燾沁水王瑄堦

禮部尚書高儀請立太子不允

重錄永樂大典成進徐階俸正一品李春芳郭朴高拱並少

傅陳以勤太子太保張居正禮部尚書蕪武英殿大學士

國子祭酒林燠加太常寺卿翰林院侍讀呂旻王希烈修撰

諸大綬並左春坊左諭德修撰丁士美進右諭德各兼侍讀

編脩孫鋌張四維為左右中允各兼編脩撰馬自強編修

陶大臨並侍讀餘賜金幣

談遷曰萬曆末永樂大典不存抑火失之耶

南京兵部尚書郭乾改北大理寺右少卿唐繼祿為右僉都

御史提督操江

治延綏丙寅失事諸將罪

壬寅暑歉釋輕囚

癸卯南京光祿寺卿江治為太常寺卿

乙巳襄府隆慶王載塢改封鄖城王載塢燠與紀元同

大理寺丞溫如璋為右少卿

許吏部右侍郎林樹聲養疾

工科給事中李貞元劾高拱剛復褊急無大臣體亟宜罷不聽

丙午禮部尚書高儀等言我朝列聖相承每接見輔弼延訪大臣或同游詠和或燕對無時明良喜起太平之業端肇於此我皇上登極數日即出御門朝宇威儀已復祖宗之舊但大廷之上體統森嚴拜起唯諾勢相懸隔若止循例具文上有懷而不得問下有見而不敢陳竊恐情意不接見聞日壅諸司奏牘中外事機豈能一一盡白於聖衷耶今山

陵已昇講幄復舉惟便殿親政尚未之及伏望朝罷即御文華殿輔臣隨入其部院大臣不時召見當罰黜陟典禮刑獄軍機會計凡當酌議者特降清問許部院陳述始末輔臣即擬可否睿斷親裁科道官各輪二人隨進如議擬未當許公同評正上報可率寢不行

丁未始御經筵宴會極門賜金幣

復鄔景和駙馬都尉給事中張鹵御史陳聯芳等訟其誣前吏科都給事中尹相禮科都給事中魏良弼加太常寺少卿戶科給事中張選加通政司左叅議南京浙江道御史馮

恩加大理寺丞大理寺正母德隆南京兵部職方主事劉世龍加尚寶司少卿各致仕吏部以先朝遺直而年七袞工例宜陞秩示優也

徐階啣恩語吏部曰建言中有望雖素著年力衰遲者宜酌處時馮恩年七十五竟加大理寺丞致仕魏良弼等六人並如之階弟侍郎陟曰奈何為馮一人而過五老哉此輩皆天下人望抑困若干年而不一起非朝廷獎直振滯之意

談遷曰華亭當國好結言路而於先朝遺直不無褊心焉魏良弼馮恩齒髮未衰遽在引年之列蓋意有所嘆也朝

廷優老之德乃為政府行其私耶

戊申戶部尚書葛守禮等言直隸山東有司變法起科太重徵派不均夫因田制賦按籍編差國有常經今不論籍之上下惟計田之多寡故民皆棄田避役沂費郊滕之間萊田彌望招墾莫應今行差役將舉山東為沂費郊滕也夫工匠傭力自給以無田免差富商大賈操貨無筭亦無田免差至襁褓胼胝終歲勤動乃更受其困此所謂舛也乞下明詔正田賦罷科差使小民不離南畝則深移漸復農事可興又國初徵賦戶部定倉庫額價分派各省小民照倉工納完欠瞭如

近年定條鞭法不倉不石每畝銀若干吏胥因緣為奸增減
洒派弊端百出宜罷條鞭法均稅額從之

談遷曰吾浙龐尚鵬立條鞭法民甚德之而葛守禮極言
其弊非齊人獨累也兩浙人多力穡故田重齊人多逐末
故田輕、重之間而利弊形矣雖然法無全利日久弊生
即吾浙今不為山東耶

己酉尚寶司丞海瑞為大理寺右寺丞南京太僕寺卿袁洪
愈為南京光祿寺卿

吏部議太常鴻臚卿仍用進士別途得為少卿任久加俸兩

房中書舍人不得陞九列

庚戌南京刑部尚書趙大佑改南京兵部尚書

禮部右侍郎殷士儋改吏部右侍郎通政使樊深為刑部右
侍郎

壬子復鄭世子載堉冠帶

刑部尚書黃光昇致仕

癸丑故巡按陝西監察御史浦錠孫朝柱入太學

甲寅故新建伯南京兵部尚書王守仁贈新建侯謚文成太
保左都督周尚文贈太傅謚武襄少傅大學士蔣冕贈少師

謚文定少保吏部尚書喬宇贈少傅謚莊簡禮部尚書汪俊
贈太子太保謚文莊太子太保戶部尚書王臬贈太子太
刑部尚書喻茂堅贈太子少保少詹事黃佐贈禮部右侍郎
右僉都御史朱方贈右副都御史各予祭南京禮部右侍郎
呂柟贈尚書謚文簡太子太保吏部尚書武英殿大學士石
瑄贈少保謚文介追奪尚書顧可學徐可成侍郎朱隆禧郭
文英贈謚告身仆其諭祭等碑奪侍郎張電誥時議奪工部
尚書甘為霖祭葬禮部言為霖雖庸劣非雜沓比得免
太僕寺少卿李一元為鴻臚寺卿

平，衛地震

套，數犯陝西

五月朔朔東安縣馬頭村人晨起望西三五里見地有涿水之
勢渺茫白色近視無有也後萬曆二年渾河衝為河道果驗
南京禮部右侍郎裴宇為南京吏部右侍郎巡撫應天右副
都御史謝登之為通政使

南京右都御史孫植為南京刑部尚書南京大理寺卿吳悌
為南京刑部右侍郎

太常寺卿署國子祭酒事林燠為禮部右侍郎兼翰林學士

丁巳 上告廟請 太祖高皇帝配祀郊

戊午 召南京吏部尚書毛愷於刑部

己未 新河成引鮎魚諸泉薛沙諸河注馬壩三河口淪舊河脩馬家橋隄過河出飛雲橋者盡入秦溝漕道大利

吳道南曰此役之興幾不免為盛應期之續非其心必欲害成也或者見不中確懼非常之原耳

庚申 提督四夷館太常寺少卿林潤為右僉都御史巡撫應天陳陞起南京禮部右侍郎改南京國子祭酒

辛酉 上親祀郊

盜殺保康知縣張士勳

六月 申朔開館修實錄

二千餘騎犯朔州叅將麻錦追擒二人斬十三級

戶部員外郎林喬相秩滿請贈生母許之仍著為例

乙酉 新河鮎魚口驟水溺人舟亡筭

丙戌 歸陰慶懷來等莊田於有司

戊子 戶部尚書葛守禮終養

己丑 量釋高墻廢人

壬辰 京師霪雨兵部郎中鄧洪震言災異疊見豈無致之者

陛下臨朝端拱未嘗清問民情奏章少覽聞後宮游幸嬪御
充斥左右近習恩賡徇情賜予頗濫號令非一前後背馳惟
陛下惕然深思暫罷游宴務齋戒感格勅戶工二部覈民田
宅傾沒之數量行蠲恤 工是之

癸巳上視朝宴輟日講禮科給事中何起鳴戶科右給事中
張爾等以為言報聞

甲午召南京戶部尚書馬森於戶部工部左侍郎魏尚純為
南京工部尚書

詔停刑

丙申諭脩省

初御史張槽請皇極等殿門仍 太祖舊額太監李芳言南
北郊合祀並下禮部議曰我 皇祖名奉天殿蓋明王奉若

天道之意 先帝因變鼎新之更曰皇極義取洪範他殿閣
名先後雖殊意各有當非臣下所輕議 皇上善繼善述凡

事奉遺詔若殿門等額遺詔未載今山陵甫畢一旦舉而盡
更之竊所未忍周禮圜丘方澤之制甚詳天地分祭在成周
已然秦漢皆主分祭自後分合靡常議主分祀十之六七主
合祀十之二三程頤朱熹號稱大儒一則曰冬至祭天夏至

祭地此何待片一則曰天地不帶合祭我太祖初建園立
方澤亦倣周禮洪武十年改合祀世宗議定四郊如洪武
初制非先帝創之實遵聖祖初意若復輕改臣等未見
其可上從之

上聞水災命各御史分賑貧民

叙河功工部尚書朱衡進太子少保右僉都御史潘季馴進

右副都御史先後河臣陞賚有差

戊戌工素服避殿御皇極門修省

巡撫浙江都御史張師載疾免

覈內府各監局積貯

己亥停工役

辛丑兵部覆御史王友賢邊務六事重將領嚴清勾革贊畫

罷關稅山海清撫賞節貢夷上是之

壬寅裁畿內冗官

癸卯戶部左侍郎劉體乾為南京戶部尚書起趙孔昭右僉

都御史巡撫浙江

丙午命朝覲官即賚萬壽賀表

武清汶上等大水

丁未命宣府巡按御史追理屯牧占田

初給事中趙軌御史周弘祖請故禮部左侍郎薛瑄從祀孔

廟御史耿定向舉故新建伯王守仁禮部言嘉靖初議瑄從

祀以論久後定宜俟將來守仁代近恐衆論不一 上是之

戊申免各莊田租十之五

故少師大學士楊謚^{廷和}文忠太子太保兵部尚書兼左都御史

王廷相謚肅敏太子太保兵部尚書聶豹謚貞襄太子少保

戶部尚書梁材謚端肅兵部侍郎曾銑謚襄愍楊守謙謚恪

愍高大節謚端愍右副都御史孫繼魯謚清愍各予祭塋南

京國子祭酒鄒守益謚文莊予祭

已酉故太子太保刑部尚書林俊謚貞肅南京工部尚書吳

廷舉謚清惠戶部左侍郎唐胄予祭塋

罷故江西按察副使汪一中專祠南京 科給事中岑用賓

言後廷舉皆先朝名臣汪一中失機殞身卹錄太厚

奪故禮部尚書盛端明贈謚前吏部文選主事史際勒免御

史陳省言端明以方藥際以醮祝也

翰林院檢討許國兵科給事中魏時亮頒詔朝鮮

禮部覆御史王得春凌儒請釋放宮女不報

壬子戶部以供用庫太監翟廷玉等催辦茶鹽米蠟各料據
科道冊報內庫尚羸乞免派如初詔從之

汰江南北兵餉改常鎮清軍同知為海防分守

輕騎犯遼東伏三千人塞外誘中軍王世祿入伏總兵王
治道援之亡卒七十餘人殺把總佟國勳等因攻鎮靜堡去

之

七 丙辰諭內閣以科道欺肆宜處之御史李惟觀言 皇上即

位首錄建言得罪諸臣今過生疑慮逆折讜論非所以謹天
戒一衆聽也工科都給事中馮成能亦言之有旨昨諭謂妄

言失實者爾等其擇之

停南京織染局工匠徵派

丁巳右僉都御史鄭世威為左副都御史起游震得南京戶

部右侍郎總督倉儲

戊午譚國佐嗣新寧伯

己未脩宣府南山邊垣

庚申贈楊廷和太保王廷相聶豹少保梁材太子太保劉劬

林俊吳廷舉太子少保張漢曾銑楊守謙商大節兵部尚書

程文德禮部尚書江曉工部尚書孫繼魯兵部左侍郎鄒守

益禮部右侍郎仍廢廷和子尚寶司丞銑守謙大節繼魯子
入太學

復故太子少保吏部尚書兼翰林學士李默官予祭墓
酒醋麵局太監馮明等請增米麥芻餉戶部執不許
散浙江募兵停徵餉

辛酉金星晝見

左春坊左諭德兼侍讀王希烈右春坊右中允兼編脩孫鉞
主試應天

故兵部員外郎楊繼盛子應尾廢入太學

壬申朝鮮國王李岷來貢賀

先帝尊謚禮部議謚號非所

賀第遠夷宜特受之遂勞幣有差

巡按湖廣御史陳省劾太和山守備太監呂祥罪狀乞徵祥

還罷其官兵部言內臣自成化初第提督道派不預民事宜

如省言 上遂撤祥停其分守已司禮監以御馬監右監丞

劉進往仍提督分守兵科都給事中歐陽一敬言劉進本名

俊嘗守顯陵罪敗成孝陵今易名希用上悟罷進以內官

監左監丞柳朝往仍分守兵部尚書郭乾言前旨已出旋復

易之殊駭傳聽遂改提督太和山關防停分守

乙亥少保兼太子太保吏部尚書楊博九年秩滿進少傅兼太子太傅

戶科都給事中李用敬等追論尚書趙文華都御史阮鶚周琬史褒善侵帑之罪命各巡按御史訊之

夜月祀畢宿

丙子貴州左布政使姜廷頤為南京光祿寺卿

辛巳紫荆關雨雹傷稼

朝鮮表賀中宮使臣洪春年等乞留觀幸太學許之

入宣府得勝堡總兵官馬芳擊却之

是月海盜陷碣石衛

八朔未朔 上幸太學釋奠御彝倫堂祭酒趙貞吉講禹謨后

克艱厥后 上心動問之知其初召

山東布政使劉懋為太僕寺卿

工科左給事中吳時來言臣從漕河來睹治河之弊在議論繁而要實未審也新河三難之說豈不以馬家橋易淺沙河易淤薛河易衝之為患哉此患在委耳源之不通委將安屬故治源者急也夫新河與青原山至近也而東究以南費嶧鄒滕之水注焉以一隄而捍群流又甯大山瀉下之勢能保

其不潰乎故疏濬分殺之謀宜豫也夏村迤邐數十里地高
必導水於薛河非開支河引薛河上流以分其派及三河口
鮎魚泉諸地鑿口築隄置閘啟閉能免衝決淤塞之虞乎故
蓄泄之計宜慎也願自今河事憲臣一人與藩臬之佐一人
專之罷濟沽南旺部臣之分理 上是之下尚書朱衡議

甲申 上御皇極殿衍聖公孔尚賢率三氏子孫詹事府吏
部左侍郎署國子祭酒趙貞吉司業萬浩等表謝

河決三河口工部尚書朱衡鑄俸一級

故太子太保兵部尚書彭澤贈少保謚襄毅刑部尚書顏頤

壽贈太子少保南京工部右侍郎何孟春贈禮部尚書謚文

簡太僕寺卿楊景贈右副都御史謚忠節御史石俞喻希禮

贈光祿寺少卿

丙戌南京兵部尚書趙大佑母老辭不赴

前山東按察副使王世貞訟父薊遼總督右都御史兼兵部
左侍郎忤之寃命復官

談遷曰 永陵嚴於邊臣少有失利斧鑕輒隨其後王忬
戮力塞上六過大 雖以才自見迨其稍挫咎寧獨追其
畢命西市實 先帝意也矧夙通嚴氏死即歸獄君子惡

居下深諒哉

戊子右春坊右諭德兼侍讀丁士美右中允兼編脩主試順天

太常寺少卿周怡工五事定君志以脩德業畏天命以消災異敬大臣以尊師道擇左右以慎近習勤朝政以飭臣工語多觸忤降山東按察僉事

罷遼洋運糧把總

辛卯總督宣大兵部左侍郎王之誥秩滿進右都御史勞薊鎮修邊吏卒二萬金

丙午巡撫山東右副都御史洪朝選為南京戶部右侍郎提督漕運兵部左侍郎兼右僉都御史張瀚總督兩廣

戊申諭內閣幸天壽山秋祭徐階等言聖孝所發異於游幸但天子之孝保安社稷為大故累朝送塋止於午門祭禮惟太廟親奉山陵皆遣官未嘗輕出以重社稷也今東西兩甸邊顧冒危而往後悔何及不聽階等再言之不聽又言天壽山後即黃花鎮、外即「萬一卒入何以禦之頃報東、土蠻等欲犯喜峰口西、把都兒等欲犯右北口此繫非輕陛下何堅其行也 上悟乃止

庚戌南京大理寺卿方廉為右副都御史總理漕運兼提督
軍務巡撫鳳陽南京光祿寺卿姜廷頤為右副都御史巡撫
山東

辛亥戶部請今後錢俱留太倉餉邊毋入內庫從之

瑞州人傅子忠為託宗室載璽直入禮部請祿收下獄論死
九月子朔南京國子祭酒呂調陽為國子祭酒

癸丑太監呂用高相陶金監團營又命脩內教場勒中貴習
騎射兵部尚書郭乾爭之未聽

甲寅太常寺少卿徐公遴為南京光祿寺卿

俺答寇大同并坪朔州老營偏頭關我叛人趙全說俺答
曰薊門臺垣甚固而選兵多銳晉中兵弱亭障稀石隰間多
肥野良鉄可致也彼藉救宣大未易卒來且千里人馬俱罷
我以全制其敵必得所欲矣俺答從之六萬騎入邊軍俱切
老營副總兵田世威嬰城自守游擊方振出戰失利復入壁
遂南下總督王之誥聞變以游兵六千騎兼程抵鳳門而
大同延綏騎二萬亦至皆相望不敢前
丙辰兵科都給事中歐陽一敬等巡視京營給事中孫枝御
史韓君恩等各諫內臣監營徐階繳旨遂寢之

已未南京工部尚書魏尚純致仕

至嵐縣諸將不扼險遂長驅而入會黃台吉覲宣府土蠻

偏灤河並告急命王之誥護陵所徵兵盡東不暇西及

壬戌至石州

癸亥陷石州知州王亮采諭富民以背嚙不應亮采忿下

城衆遂潰殺亮采男女死者數萬人總兵申維岳住大武店

距城四十里不救僅尾之報至命發兵二萬往援度弗及罷

師分犯涑水交城平陽介休遣聞入汾內應叅政宋岳擒

之焚其偽書以安衆攻一晝夜而去

庚辰山東布政司右叅議喬應光家石州聞陷成疾乞休

上聞之特予告外官例不歸省

辛巳罷湖口縣艇料

應天府尹徐應進程錄不謹奪俸二月

十月午朔故禮部主事臧文奎子繼蓋入太學

華昌推官王蓋臣犯贓刑部以恩詔請不許其治如律

癸未南京吏部右侍郎裴宇為南京工部尚書刑部左侍郎

林雲同為南京右都御史左春坊左諭德姜金和為南京國

子祭酒

甲申夜金星入南斗

乙酉 工日講畢問輔臣石州事諭選將調兵

兵部尚書郭乾劾免侍郎遲鳳翔鑄三級

撫治鄖陽右僉都御史劉秉仁免秉仁被劾擬調給事中吳時來言秉仁前議革分守太和山內臣已薦太監李芳亡大臣節坐罷

丙戌俺荅始出塞計損我人畜數十萬巡按御史王漸劾王繼洛言「下岢嵐去代五百里而遙撫臣若鼓行而西則知軍曲折可鞭箠使之而顧留代不行及」至汾則應發鴈代

之卒一當「乃七日不發一卒彼謂甲不足耶材官五萬徒以自衛耳

土蠻東出義院口會大霧迷失道墮棒槌崖中崖深十餘丈騎填焉延綏游擊張臣等趨之報斬九百五十五級總兵李世忠多濫殺稱功

工部尚書朱衡因三河口決請從東邵開支河三泄之又開支河於東邵之工歷東滄橋達於百中橋又鑿渠牙溝等處使水入赤山呂孟諸湖下景山而去又築壩沙河支派下令水自鮎魚泉以出更對泉治塘堤以納派殺勢脩改楊莊南

陽佃戶屯留城諸閘以時節宣從之

丁亥畏寒停經筵日講閣臣言徹講太早不聽

御史陳省劾遼王憲熾僭侈亂倫多殺無辜命奪其人賜印
所任奸人下於理

總督陝西左侍郎霍冀為兵部尚書

戊子總督劉燾王之誥巡撫耿隨卿王繼洛總兵申維岳李
世忠俱失事奪祿

己丑工科都給事中馮成能言臣從新河來度其地自南陽
而下抵鮎魚三河口地高平故水漫溢且閘滄隄潰不可制

三河滙衆派西注下達新河猶高屋建瓴衝激為淤旱潦皆
可慮夏村以南多藉閘泄其水勢高下相懸幾及於丈由此
觀之功雖告成猶宜預備工下朱衡熟計之

庚寅覈江南寄田洒糧之弊三冊釐正

壬辰巡撫大同右僉都御史張志孝免

甲午巡撫陝西右僉都御史楊巍為右副都御史提督鴈門
等關兼巡撫山西南京太僕寺卿劉光濟為右副都御史巡
撫江西湖廣右布政使孫應鰲為右僉都御史撫治鄖陽
免永平田租及天津治河之役

起李攀龍浙江按察副使

巡撫寧夏右副都御史王崇古為兵部右侍郎總督陝西三邊軍務

乙未刑部右侍郎樊深為左侍郎南京戶部右侍郎洪朝選為刑部右侍郎

南京吏部尚書劉采改南京兵部尚書

召福建總兵官戚繼光入朝協理戎政總督薊遼劉燾免

丙申戶科都給事中魏時亮請祀先臣薛瑄陳獻章王守仁於孔廟下部議

遼山西巡撫王繼洛薊鎮巡撫耿隨卿總兵官申維岳李世

忠及保定都司吳光裕永平游擊齊進忠獄上當維岳逗撓棄市繼洛謫戍王之誥以備懷來自解奪一官

丁酉太常寺少卿張祉為右僉都御史巡撫陝西浙江布政司右叅政劉祐為右僉都御史巡撫大同

起朱爰右僉都御史巡撫寧夏

戊戌南京禮部右侍郎陳陞平陞餘姚人嘉靖辛丑進士贈尚書謚文僖

前署都督僉事郭琥起總兵官鎮守永平山海

己亥大理寺卿盛汝謙為南京戶部右侍郎

南京戶部尚書吳嶽為南京吏部尚書工部左侍郎張守直

為南京大理寺卿兵部右侍郎曹邦輔為左侍郎兼右僉都

御史總督薊遼保定巡撫河南右僉都御史劉應節改整飭

薊州邊備兼巡撫順天

庚子故兵部尚書翁萬達謚襄敏兵部左侍郎陶諧謚莊敏

吏部左侍郎董玘謚文簡

定京師九門稅課分五城御史各令兵馬司指揮徵之

辛丑下前宣大總督楊順巡按御史路楷獄順楷殺經歷沈

鍊吏科左給事中陳瓚追其冤戊未蔽辜遂逮入論棄市

癸卯薊鎮墻子崩屬夷私梓哨卒叅將吳昂救之被殺

甲辰諭閣臣禦東西之策其詳上之

寧夏總兵官雷龍靈州叅將何其昌出塞搗敗之斬二十

九級

減太常光祿庖人內府官匠

乙巳巡撫保定右僉都御史曹亨為兵部右侍郎協理戎政

巡撫湖廣右僉都御史楊豫孫為大理寺卿

丙午大理左少卿溫如璋為右僉都御史巡撫保定兼提督

紫荆等關起王國光戶部右侍郎兼右僉都御史巡撫河南
禮科左給事中陸鳳儀削籍鳳儀言兵事首述聖諭竄數字
忤旨

戊申太僕寺卿劉慤為右僉都御史巡撫湖廣

詹事府吏部左侍郎兼學士趙貞吉為南京禮部尚書

古田盜韋氏夜入桂林城獲之

己酉增通州月城

山西副總兵田世威叅將黑雲龍等逮獄總督王之誥免

十月丙辰故朝鮮國王李烜謚恭憲命中官妣臣行人歐希稷

往祭岷從子昭封朝鮮國王

起陳其學兵部右侍郎兼右僉都御史總督宣天山西

丁巳廣東總兵官湯克寬免切青總督張瀚克寬前撫海盜

曾一本居潮陽之下滄潛劫海上致攻揭陽

己未大理寺左寺丞海瑞為南京通政司右通政

庚申署翰林院禮部左侍郎潘晟改吏部左侍郎署詹事府

辛酉徐階等既廷議禦上十三事曰青霄效詔令教下邊

臣鮮以實應如薊鎮嘗修邊而近從羅漢洞入山西石州

嘗築城而院委之道委縣上下相蒙遂成陷沒當痛懲此

獎軍士逃沒必實補疲羸必實選城堡必足防禦器械必堪
擊刺而尤公行賞罰芻餉時給躬親閱視否則巡按部科劾
治或數月特遣才望大臣帶司屬分詣諸鎮查驗實效奏請
賞罰每三年遣官巡視庶今所議不為虛談曰定責任各邊
總督總兵巡撫責任均重但比歲失事總督受辟而總兵漏
網黃緣復用故議者遂欲專責總兵且諸邊巡撫勅書有訓
練調遣等語倘專任糧餉而臨機調遣悉責總督在薊鎮去
總督近聽命為便若山西遼東寧夏甘肅保定諸將不取裁
於在近之巡撫而遥制於在遠之總督其能及乎且令督撫

鎮道各遵勅行事遇有功罪自總督以至副叅游守兵備有
司照職任例定賞罰曰明戰守用兵必審地利薊鎮天險可
因當主於守脩邊必不可廢山西諸路地多平衍當主於戰
然邊牆亦可捍零騎抄掠使邊民得耕牧則今未能戰又未
可棄守群臣欲戒薊鎮入衛官兵臣未敢輕擬宜令總督以
戰守責各鎮入衛官兵脩邊責主兵宣府之當守南山保定
之謹哨探大同之搗巢遼東之積貯吏部所論宜即舉行曰
申軍令主將之所以制偏裨與所以練卒伍者已他號令嚴
耳今自總兵下臨陣不能僇一卒而副叅游守原受總兵節

制茲各領兵三千亡異釐案如此令安能行也宜立定例凡
領兵官亡論叅游守臨陣但部卒退縮者許即斬首以徇其
領兵官退縮把總以下許總兵及副總叅游亦即斬首以徇
呈總督奏聞叅游副總許總兵官具罪狀呈總督奏請曰將
帥將官與文職其文檄禮接自有成規近又臣或凌辱將官
侵其事將權日輕今後慎選總兵得其人則各營中軍千把
總管隊等官許其自辟叅游守備等官許其共撥去留遣謀
購間等費徑從督撫關支如事大則特奏糧草器械馬匹等
或缺或贏呈督撫覈處總兵見總督副總叅游見撫按自稱

名稱總督曰軍門撫按曰本院不許詆下自損威重曰練軍
兵薊鎮脩邊不暇練各鎮又專恃家丁殺賊所部卒亦不練
宜自來年為始各部軍士清占冒汰老弱選教師習藝尤重
火器第其能否而賞罰之曰繕城堡堅壁清野禦下之一策
諸鎮凡城堡低薄者增修之或創築其費取撫按等贖銀不
給則支帑金軍民捐助立為勸獎守具槍砲等令郡縣如法
製造曰團民兵燕趙三晉古稱用武多才之地各督撫兵備
令有司選鄉民編伍擇有身家信義者為堡長統之時習騎
射有警則同拒守若擒斬有功陞級世襲其不願陞者予五十

金工司於民兵止閱視賞罰不得追呼送迎及調赴他役曰
處久任邊方危若與內地異徒持久任之說而不有以處之
使才能之士積勞不遷將以才能為諱矣望勅吏兵二部今
後各邊總督鎮巡既受命從事聽其展布寬其文法需以歲
月積以年勞督撫及兵備三年考滿近例陞廕總兵及副叅
游守脩職防秋三年無事督撫奏請加恩各勿易地俟再考
總叙超擢其小過勿輕劾如事不可已或降秩俸或革職仍
令在事立功自贖曰廣招納令中多華人未嘗不思故土
但將官或妄殺邀功故不敢自歸幸而生還有司又不加卹

故甘為賊用近兵部立招降賞格令各邊總督鎮巡榜示邊
外諭陷一能計斬大酋如俺荅黃台吉把都兒吉能土蠻等
函首來獻封世伯賞五千金計斬逆賊如趙全周元等函首
來獻世都指揮僉事賞千金其率歸男婦五百人以上授指
揮同知三百人以上授指揮僉事各世襲餘各有差十人以
上免徭役若趙全周元自悔來歸許以不死曰儲人才九卿
科道各舉所知下部訪照資俸請添注於兵部堂司及各卿
寺以備任使各邊督撫巡按薦舉將官亡論指揮千百戶鎮
撫一體訪薦而軍民人等果巧技及力舉千斤者即給道費

送兵部試用曰理鹽法先年商人中鹽各邊納本色屯軍貧不能耕者商人資以牛種秋成分粟故鹽法與屯田相為表理近來鹽法大壞乞廷臣舉才臣理鹽重其事權俾之清理因興屯田之利裕塞下之民曰擇邊吏沿邊知府必加審慎其府佐州縣必多進士除授及下第貢士果年壯收選日後陞遷照近例繁簡各加優異上褒答其即行之

癸亥冬至上親南郊還御皇極殿行慶成禮

甲子免宴賀

丙寅鴻臚寺卿李一元為太僕寺卿江西道監察御史龐尚

鵬為大理寺右寺丞工科左給事中吳時來為順天府丞

丁卯左春坊左諭德兼侍讀諸大綬為侍讀學士署院

己巳郭成為署都督僉事總兵官鎮守廣東

故鎮國將軍佑祠追封南康王謚崇僖從其子淮王載培之

請

庚午改隆慶殿曰慶源殿隆慶州曰延慶州避紀元也

兵部右侍郎吳桂芳為左侍郎召練兵兵部右侍郎兼右僉

都御史譚綸佐部

右副都御史鄭世威為南京吏部右侍郎太常寺卿鄒應龍

為大理寺卿太僕寺少卿李用敬為鴻臚寺卿
癸酉行人石星主事劉繼文為吏工科給事中主事謝廷傑
劉世曾饒仁侃周禧行人燕儒宦為御史
乙亥右僉都御史何維柏為左副都御史順天府尹陳紹儒
為太常寺卿

丁丑琉球國中山王尚元來貢

戊寅國子監祭酒呂調陽為南京禮部右侍郎

山東左布政使李芳滿六年考宗戚不內遷命進俸一級
裁江西冗官

己卯光祿寺卿徐貢元為順天府尹

十
壬辛巳朔命吏部博訪人材

壬午詹事府吏部左侍郎兼翰林學士潘晟翰林侍讀學士
諸大綬纂脩玉牒左春坊左諭德兼翰林侍讀王希烈為國
子祭酒

河南布政司右叅議富順謝廷蕙致仕廷蕙始官吏科敢言
謫外稍遷至浙江按察僉事引去至是起中州不赴

癸未太常寺少卿趙錦為光祿寺卿

甲申裁九江分巡僉事并於饒州兵備

乙酉左春坊左中允兼編修張四維為左諭德兼侍讀
禁撫按官訟牒不得發武職及雜途官

丁亥戶科都給事中魏時亮言遼東自罷海運轉餉甚艱乞
歲間一行之則山東米粟貿易兩利許之

故巡撫 右僉都御史阮鶚卒

己丑故禮部左侍郎何塘謚文定復大學士夏言官故大理
卿朱廷立刑部 侍郎詹翰鍛獄追削其籍

辛卯國子司業萬浩為南京右春坊右諭德署院

壬辰總督京營鎮遠侯顧寰同給事中孫枝御史 等考

閣將領

癸巳起戴才右副都御史巡撫河南

汰錦衣衛軍校及監局冗役

甲午辰刻有大星色青白自中天東派尾光二丈餘

乙未故南京戶部尚書贈太子少保徐問謚莊裕

丙申故御史葉經子志周入太學

丁酉故刑部尚書蔡雲程贈太子少保予祭葬

成國公朱希忠攝享太廟徐階言 皇上當萬國來王之初
宜致廟享萃合天下之心而無故遣代恐非所謂萃之道也

夜風霾

戊戌工部主事楊時喬言時政幾之當慎者三勤朝講為修德之幾親裁章奏為出令之幾聽言能斷為圖事之幾獎之最重者九曰政體怠弛曰法令數易曰賞罰冒濫曰納蠶太多曰用度太繁曰莊場擾害曰習俗侈靡曰士氣卑弱曰議論虛浮勢之偏重者三宦事之權重於難制宗藩之祿重於難給邊境之威重於難振 上是之

諭戶部覈內庫太倉出入之數尚書馬森言太倉見金百三十五萬四千六百五十二兩歲支祿糧百三十五萬有奇邊

餉二百三十六萬有奇補年例百八十二萬有奇共五百五十三萬有奇計僅足三月京倉見糧六百七十八萬三千一百五十一石歲餉二百六十二萬一千五百餘石值閏月加二十二萬餘石合計足二年有餘願念國儲之匱乏恤民生之艱難視銀數之少若此則百金之費必思所以惜之視糧數之少若此則九年之蓄必思所以致之守此不變力由節儉一切權宜搜括 上手詔帑匱至此朕用度毫未妄費卿其悉心計之

己亥吏科都給事中王治等言吏治三事定等則以辨才賢

公論劾以一事體脩實政以圖治安 上是之

壬寅鹽山縣丞王邦直上十事減賦役以招涿移實倉廩以備凶荒戒有司以去奢僭清驛遞以革冒濫禁勢豪以除暴橫正仕途以塞奔競重功績以明考課慎作養以別繁冗嚴簡練以修武備振紀綱以勵風俗 上善其言下部採議

談遷曰 穆廟拱默少所裁答其念石州之失陷憂帑藏

之缺乏錄王邦直之封事意固惓、矣

乙巳復故太子少保吏部尚書萬鍾贈太子太保巡撫山西右副都御史江朝贈兵部左侍郎並予祭葬故貴州道御史

郭洪化河南道御史王時柯兵部武庫主事余禎並贈光祿

寺少卿刑部郎中胡璉贈太常寺少卿

論薊鎮功罪總督劉燾鑄二秩巡撫耿隨卿削籍總兵官李

世忠遣戍都司吳光裕等下巡按御史訊之遼東總兵官王

治道進署都督同知巡撫魏學曾進右副都御史叅將羅端

董一元延綏游擊張臣遼東游擊卽得功尚智各進二秩趙

臣等進一秩仍賚金幣

談遷曰棒槌崖之役雖、迷霧失道諸將士帶甲窮追徼天之幸亦不為亡功幕府工級輒從吏議何也後御史闕

實七百二十 級賞不酬勞投杼易疑鳴劍難勵張臣之
痛哭有自來矣

丁未前巡撫山西右僉都御史趙時春卒

巡撫貴州右副都御史杜拯上言沅靖二州與平清偏鎮銅
鼓五開之民去湖廣酉陽播州永寧三土司之去四川俱遙
屬于二省而兼制于貴州服役者興遠道之嗟蒞事者無畫
一之軌于民情政體甚不便也以數州衛土司專界之貴州
其便有十且各省會城府縣並置貴州獨闕每事委之首領
與指揮及宣慰司夫首領類皆異途政體鮮諳指揮則尤甚

矣故士民皆欲增建府治而該司議程番府附省會其說可
行也又貴竹長官司所轄皆派寓之子孫與苗民不同龍里
所轄平伐長官誅削已久尚無所屬俱應改縣附程番為便
上命改程番入省立二縣其州衛統轄下部議至萬曆中平
清偏鎮始隸貴州

是年暹羅入貢請印許之禮部儀制郎中鄭汝璧以印文未
詳閣臣言暹羅國王耳汝璧以初封不必王具篆文又小異
亦不足取信諸國留一使京師以一使歸取印牒至則都統
制使印也使臣揭元禮江西人求居廣東貢使強之返汝璧

曰華人還華固其所也先是東蠻牛國忿暹羅拒婚攻陷之
王自經虜世子及印

戊辰隆慶二年

正朔亥朔御皇極殿受朝賀

直隸巡按監察御史顧廷對上六事治貪墨酌遷除慎選代
議兵餉清國稅查班銀上覽之曰貪官止斥免誠無以懲
其令部院以罪工
癸丑「賓免台吉寇靖」城

戊辰陝西按察副使姜子憲請朝覲官各獻羨餘布政三百

金按察二百金通下有差工不許仍禁科歛累民

己巳移皇太子座於文華殿東廡西向故事箋賀設座殿

工嘉靖十五年殿易黃瓦專經筵

裁浙兵八千人省紹興兵備官歸其事海道副使

辛未故紹興知府黃縉贈太常寺少卿縉忤桂萼諫武宗南巡廷杖晚劾陳光

被逮

瘦死

刑部左侍郎樊深罷
鳳陽南山盜殺鎮撫張希賢

丁丑風霾

戊寅戶部右侍郎萬士和改禮部右侍郎巡撫南贛兵部右侍郎兼右僉都御史吳百朋為南京兵部右侍郎

已卯故南京通政司右叅議徐學詩贈大理寺少卿

吏科給事中石星工六事曰養聖躬 陛下清心寡欲漸不

如初今為鰲山之樂必縱飲必耽聲色皓齒娥眉伐性之斧

甘脆肥膿腐腸之藥倘不亟戒萬一起居失調悔將奚及曰

講聖學今經筵屢請未見慨俞竊恐歲月愈邁德業無聞不

亦重可惜哉宜及時舉行使聖學日懋曰勤視朝即位以來

宵衣旰食歲無虛月自正月來稍倦於勤若有奸諛迎合以

先帝二十餘年不出宮闈天下晏然勸陛下效尤則大不

可 先帝雖不視朝大阿獨持 陛下當叢脞之後不加勤

厲何以保終曰速俞允 陛下初立聽言納諫或事涉亡當

亦即降旨今則有不允者固未審如何而允者亦常違期或

左右過抑耶願自今常奏三日而下兵事則不時進覽曰廣

聽納 陛下下詔求諫未幾而少卿周怡觸忌諱出外給事

中陸鳳儀誥悞削籍若更有批鱗引裾之臣將何以處之乎

望召還二臣仍諭諸臣毋以言為戒曰察讒諂請今公道昭明

間一二內臣專作威福切齒言官欲行中傷言官過直則曰此人欺或過激則曰此人慢漸清既久不覺其入而怒之矣惟深燭其情悉置不聽跡入上怒其輕訕杖六十削籍庚辰工科左給事中王璽等言內庫之弊在外有三曰包攬曰解戶私逃曰那移延緩在內有四曰鋪墊曰守門科尅曰私儀曰棍徒需索乞盡革之報可

兵部左侍郎鮑象賢卒贈工部尚書予祭葬

二朝已朔禮科左給事中張鹵言 皇子方在睿齡宜初司禮監擇端良識大義者日侍左右口授書陳民事 上然之

大理寺卿鄒應龍為左副都御史總理兩廣江浙福建廣東雲貴鹽屯南京右僉都御史唐繼祿為右副都御史總理河東川陝宣大山西鹽屯大理右寺丞龐尚鵬為右僉都御史總理兩淮長蘆山東蕪江北山東薊遼保定鹽屯各給印勅談遷曰屯鹽總理誠不可無第轄制半天下遙領數千里之外不過飛檄懸決各道上簿書應命耳裁報之間動隄旬朔其情偽利弊寧一一而悉之哉

太僕寺卿李一元為通政使

乙巳改石州曰永寧

丙午南京國子祭酒姜金和致仕
丁未工發京師謁陵次鞏華城

戊申至天壽山御感恩殿

己酉工在山陵欲出游徐階曰陛下以祀至非游也如先游而祀後之謂孝思何乃止諭輔臣曰朕始知邊鎮近京如此而邊臣專虛文塞青豈不悞國其傳示宣薊二鎮飭備令總督鎮巡官條上方略勞二鎮護從吏卒五千金量免所過田租

庚戌上親祭長陵永陵餘分遣即日駕還京

是月貴州火五日

遷程番府於省城改為貴陽益以貴竹平伐二司

三甲寅陝西及蒲州安邑裕州鄆陽並地震西寧衛天鼓鳴南城縣雨土

丙辰刑部右侍郎洪朝選為左侍郎南京吏部右侍郎鄭世威改刑部右侍郎順天府丞吳時來為南京右僉都御史提督操江通政司右通政姜寶為南京國子祭酒翰林編修林士章為國子司業

丁巳大同總兵官孫吳搗於亂山子斬三十四級

戊午太常寺少卿趙灼為通政司右通政提督騰黃
仍命太監李佑往蕪杭織造工部以明詔方撤毋渝大信
上趣佑亟往都給事中孫枝御史郝杰各言之不聽
己未直隸新城縣有聲自空如雷隕黑石二
大風霾

辛酉立皇太子翊鈞詔天下

壬戌受賀

癸亥光祿寺卿趙錦以永樂初尚膳監羊房地十三頃在韓
冢川冷泉後移西琉璃窑厥牧卒歲費數千金宜罷之不許
乙丑策貢士田一儁等賜羅萬化黃鳳翔趙志臯等及第出
身有差

調廣西總兵官俞大猷於廣來時海盜曾一本等擄甚

丙寅南京工部尚書裴宇改南京禮部尚書

起林樹聲仍吏部右侍郎

兵部右侍郎譚綸為左侍郎兼右僉都御史總督薊遼保定
四川右布政使嚴清浙江右布政使熊桴為右僉都御史巡
撫貴州廣東

御用監請金箔漆硃等料工部言宜視嘉靖初額毋溢從之

甲戌巡撫河南右副都御史戴才為大理寺卿戶部左侍郎
徐養正為南京工部尚書南京大理寺卿張守直為南京戶
部右侍郎巡撫宣府右僉都御史冀鍊為兵部右侍郎
徐文壁嗣定國公

聽降右都御史兼兵部左侍郎王之誥劉燾各兼右僉都御
史巡視邊務之誥山西宣大薊遼保定肅陝西延綏寧夏固
原甘肅

遵化地震大雨雹

丙子 上幸南苑有內臣稱南苑之勝前命駕閣臣徐階等

言上林苑止鹿兔非如視學耕籍有闕治理不足仰煩臨視
及九卿科道交阻之不聽及駕至宿莽沮洳宮館不治即日
還

談遷曰巡狩田獵古帝王不廢其徒御簡靜未嘗擾民也
後世千乘萬騎馳騁驛驛故深以盤游為戒若近郊經歲
一出 祖宗以來亦間見焉日者因陵之禮既畢稍覽風
物即南苑咫尺偶一寓目亦恒情耳諸臣交口必沉、九
重之為安開人主厭薄之端及輕言路是亦不可不思也
丁丑起王遴右僉都御史巡撫宣府大理寺左少卿李邦珍

為右僉都御史巡撫河南

戊寅京師及永平遼東登州地震寧遠城圮樂平縣地裂涌水黑

四朝已議覈勲戚莊田

奪承天府元祐宮田租入宮

壬午令內承運庫太監崔敏以戶部六萬金市黃金一萬尚

書馬森等難之先帝曾市金二千色惡見貯太倉命進之

癸未河南陝西地震

甲申萬全都司大雨雹有赤黑二雲如鬪

乙酉陝西地震壞城堡傷人畜甚衆

戊子宣府邊垣竣

己丑貴州隆阡等寨叛苗平

庚寅改贈林俊少保俊刑部尚書致仕進太子太保前贈亦

太子太保其孫及祖以請

辛卯故台州知事武暉廕子尚冕太學

壬辰翰林檢討成憲禮科右給事中王璽頒詔朝鮮

後府僉書署都督僉事徐珏有罪免

癸巳延綏總兵官趙奇等搗斬六十七級復奇祖職

乙未賜慶都伯杜繼宗德平伯李銘固安伯陳景行錦衣衛都指揮僉事李偉各田七百歸

甘肅總兵官劉承業免

丙申脩禁門城樓

釋輕囚

丁酉楊順獄死

戊戌蒲州滎河河津地震

辛丑故左都御史張永明贈太子少保謚莊僖

壬寅故吏部右侍郎王道贈禮部尚書謚文定南京兵部尚

書湛若水謚文簡

乙巳復趙岢署都督僉事改鎮守大同

許堃左春坊左中允郭希顏先是首藏南昌天寧寺

丙午傳制封新會王睦崧崑山王謨堽河南王新墻鄒平王

顯在崇德王載陞

戊申榆林常樂堡旂端有火光

五廟戊朔署都督僉事董一奎總兵鎮延綏

山西永寧州山崩

辛亥總督薊遼保定譚綸言練游兵之難不如選見兵三萬

入分三營屯密雲遵化各叅將游擊一中軍住三屯營屬總
兵郭琥仍付戚繼光總理薊遼保定練兵總兵官以巡撫劉
應節提調而臣總之又選浙兵三千習銃從之命戚繼光仍
署都督同知總理薊昌保定練兵事各鎮受節制如綸遣官
募浙兵三千人

壬子晉府旌德王知燉薨

甲寅錦衣衛經歷牛應龍等以父某前大計削籍求移封吏
部言貪酷削籍例不封贈

順天府尹徐貢元為南京大理寺卿

辛未兵部右侍郎冀鍊兼右僉都御史巡視山西宣大薊遼
保定

丙子太監趙玠往南京織造工部止之不聽兵科給事中陳
邦顏疏入奪俸二月

丁丑襄城伯衛守正卒

入寧夏大掠

六辛卯巳太僕寺卿靳學顏為光祿寺卿

選翰林院庶吉士徐顯卿陳于陞張一桂沈一貫李長春韓
世能賈三近王家屏沈位田一儒朱曆沈懋孝張位李熙林

景賜徐秋鶚張道明邵陞何維椅李維楨郭莊王喬桂劉東
星子慎行范謙張書李學一習孔教劉應麒鄭國仕詹事府
禮部尚書兼學士敷士儋趙貞吉教習

壬午裁揚州叅將

甲申山西樂昌王允燠訴宗祿積負求兩淮殘沒鹽濟置不

許別給萬金

戊子蠲河東積逋鹽課

己丑海盜曾一本寇廣州殺聽調知縣劉師顏

辛卯賑陝西被震灾民

癸巳南京國子司業金達劾免

總督薊遼兵部左侍郎譚綸工三營練兵事宜臣與戚繼光

專其事毋預巡按巡閱御史從之巡按御史劉翺巡閱御史

孫代以為言命兵事悉付綸御史歲閱

談遷曰議事易任事難當時練兵薊門梅雄鎮馬則譚司

馬專事之效也嚮使旁史叅其說方論辨蜂起戚繼光救

過之不遑能與司馬共功乎

乙未罷真定權木內臣從太監李芳之請

寧夏地震焚感祀太微西垣右執法

丁酉山東按察僉事周怡改南京國子司業
乙巳汰錦衣衛冗役三百五十九人

丁未給薊鎮火器戰車之值

海盜曾一本寇廣州殺聽調知縣劉師顏總督張瀚問計於
總兵俞大猷答曰賊所畏閩艇閩兵宜造舟募兵於閩瀚遲
之大猷作拙速解曰孫子有言吾聞兵以拙速未聞巧久夫
此春秋戰國紛爭互併之術今天下一家賊子弄兵命將征
討堂正、十圍五攻剪絕枝根而後已苟圖欲速不顧大
計是偉功也夫速而徒拙何取於速久而能巧何嫌於久愚

謂今日截殺鵬剿戰國用兵之師也速不嫌拙大舉征勦古
帝王問罪之師也巧不嫌遲漸不能用

七月酉諭輔臣申飭防秋

盜入蕪州劫庫傷吏卒

庚戌劉燾添注兵部左侍郎

辛亥刑部左侍郎洪朝選錦衣衛指揮僉事程堯相往按遼
王憲燭罪狀朝選請偕河南布政司右叅議董文舉山東按
察副使吳道直從之

壬子朱岡嗣撫寧侯岳之弟

甲寅總理山西等屯鹽右副都御史唐繼祿疾罷

復故錦衣衛正千戶李拱辰沈欽盧永昌官嘉靖初議禮謫

戊

乙卯南京戶科給事中張歷治等上脩弭災異七議勤政親

賢立信足兵食平寇盜復軍儲察幽枉語多觸忌革內批罷

織造上不憚雖下所司而兵部覆上切責之

勒慶成王府廢人知煥自盡手殺從子奉國將軍知燧子新

塏也

丙辰內使毆巡視中城御史李學道於左掖門外內使許義

嘗校刃脅人金錢學道遽笞之會朝罷其黨群捽學道踏地

工聞之命執數人首杖之百遠戍餘戍考陵學道坐檀笞

謫

丁巳大理右寺丞凌儒為右僉都御史總理山西等屯鹽

故太常卿署國子祭酒胡正蒙贈禮部右侍郎詹子承烈國

子生錄潛邸舊勞

戊午山西承差杜經朔州諸生李春艷俱陷，脫歸授鎮撫

辛酉陵川縣地裂

戶科都給事中魏時亮言天下有大三患藩祿不給也邊餉

不支也公私告匱也創立宗學勸賑貧宗此藩封一時之計
散谷宗近處或給閒田自耕代祿則百世利也屯鹽近遣大
臣事權雖重地廣難周力分易諉當專主塞下久任責成今
府庫空虛籠天下之財悉入內府克旦夕之用甚非地方之
福也宜亟停寢夫養民在守令守令要務勸農商減雜徭行
錢法重鄉約嚴保甲而簿書獄訟及催科之巧拙不與焉於
此重舉劾之典嚴連坐降罰之令則恤民足國亡遺策矣
上大是之

癸亥總督宣大山西右都御史陳其學上防秋事宜往時汾

石之敗由擺邊官軍力分勢隔今議西路叅將方振等駐水
泉營中路叅將王懷邦等駐葭麥川北路叅將牛相等駐馬
蘭堡東路叅將戴椿駐廣武城總兵謝朝恩任陽方口調度
往時防秋兵盡出守邊致乘虛深入今議汾州叅將屯永寧
太原叅將屯會城防河叅將屯灰溝營分守要害使廢將同
民兵團練防往時入調兵莫先今議府川急叅將方振
即間道直趨太原與錢棟合西川急叅將戴椿即間道趨永
寧與陳文範合閒將孫鎮等分列汾州寧鄉靈石平定間當
其前總兵戴希舜逐其後總兵謝朝恩調各游兵結營堵隘

臣所為備若此又馬芳趙奇謝朝恩皆材勇可任宣大山西各兵不下萬人誠得三臣分練之則鎮兵強矣部覆從之甲子戶科左給事中張齊劾大學士徐階不職先帝神仙土木之事皆階贊成及草遺詔歷教其過與嚴嵩處十五年締交連姻嚴氏敗即攻之大節虧久比者諸邊告急屢屢宣諭猶養交固寵擅作威福上怒其誣詆謫

乙丑徐階疏辨乞休不許

巡撫浙江右僉都御史趙孔昭為戶部右侍郎太常寺卿陳紹儒為南京刑部右侍郎

丙寅大學士徐階致仕賜遣行人護行尚書吏部楊博兵部霍冀刑部毛愷各上章留之報聞初太監李芳事上潛邸薄階黨嚴氏又數上章不盡得頗心望焉當階乞休張居正以階柄久密報芳階訖不任矣遂許之下戶科給事中張齊鎮撫司獄前齊使宣大受鹽商某三千金還奏鹽制戶部格之商索金恐事發故攻階左都御史王廷以聞後齊削籍

談遷曰初嚴氏敗華亭柄政人心嚮慕羽翼亦廣故齊康朝工書夕出春明之外矣張齊襲其說雖元宰下席而即

繼張齊以謝華亭母乃全交之是亟借白簡以快之哉彼
張齊何足論執法大臣當自惜舉動或令臺臣糾之可也
丁卯福建都指揮僉事傅應嘉受海盜吳平賂縱之伏誅
己巳科道並乞留徐階報聞

壬申起谷中虛右副都御史巡撫浙江廣西左布政使陳慶
為太常寺卿

蠲蕪松常鎮工部料價

癸酉禁南京入貢內臣濫用馬廄
乙亥除大名真定馬地餘銀

丙子台州颶風大作潮溢溺三萬餘人壞田十五萬畝被災
四十萬五千餘戶絳州西北天裂

八月邛雲南叛酋鳳繼祖伏誅官軍窮追其黨斬首來獻

壬午寧陽侯陳維藩卒

癸未御日講

己丑開經筵

故薊州叅將吳昂贈都督僉事初昂禦墻子嶺死之予塋
費御史劉翹言昂挺身殉寇畢命窮沙吏議見挫僅得薄賞
是軀命同於數金觀望賢於一死乞重加卹錄以勵邊臣

辛卯復錄宣大降人白春魏良相田汝光田汪王現等仍定
招降賞格初大同妖人丘富走，令築城堡宮室於豐州曰
板升逃人萃馬每入寇輒前驅鄉導塞上若之前購賞格多
自歸白春等各有所部畜產聞風來降命授近衛百戶勞五
千金仍懸賞塞外各邊皆然

壬辰陝西盜魏太清涿劫絳州太平尋渡河道

庚子淮揚巡鹽監察御史孫以仁侵帑數千金龐尚鵬劾之
奪官

癸卯劉世延復誠意伯

吏部左侍郎王本固自劾乞罷不聽尚書楊博令本固出試

目蒼頭泄之為奸故投劾上命法司罪蒼頭共事者

甘肅旱饑免屯租

甲辰衛國本嗣宣城伯

左春坊左諭德兼侍讀張四維清理貼黃

湖廣饑議蠲卹

丙午少保兼太子太保禮部尚書武英殿大學士張居正上
大本急務曰省議論天下之事慮之貴詳行之貴力謀在於
衆斷在於獨頃年以來議論太繁或一事而甲可乙否或一

人而朝由莫詎或前後不覺背馳或毀譽自為矛盾是非滄
於唇吻用舍決於愛憎政多紛更事無統紀又督撫等官初
任例有條陳或漫言數事或更置教官其實臨政之始利弊
豈盡周知賢否豈能洞察不過採於衆口讀其詞雖若爛然
究其指歸毫未有效久或并其自言者而忘之矣如昨年廷
議防「之策今將暮矣其所言果盡行所行果有效乎又如
薊鎮之事初議曰吾欲云云當事亦曰云云曾無幾何而將
不相能士譁於伍異論煽興於是罷練兵者又紛、矣夫事
無全利亦無全害人有所長亦有所短要在權利害之多寡

酌長短之攸宜委任責成庶克有濟望自今以後掃無用之
虛詞求躬行之實效欲為一事須審之於初務求至當及計
慮已審即斷而行之如唐憲宗之討淮蔡雖百方沮之而不
為搖欲用一人須慎之於始務求相應既得其人則信而任
之如魏文侯之用樂羊雖謗書盈篋而終不為之動又一切
章奏務從簡切是非可否須明白直陳毋彼此推諉徒託空
言其大小臣工亦宜誠心直道勉修職業反薄歸厚尚質省
文庶治理可興矣曰振紀綱詩曰勉、我王綱紀四方此人
王太阿之柄不可一日倒持者也近年紀綱不肅上下姑息

百事悉從委徇模稜兩可謂之調停委曲遷就謂之善處法
之所在惟加於微賤而強梗者雖壞法亂紀而莫之誰何禮
之所制及在於朝廷而為下者或越理犯分而恬不知畏陵
替之風漸成臂指之勢難使然人情久玩驟一振之必將曰
此拂人之情又將曰此務為操切者也臣請解之夫徇情之
與順情名雖同而實則異振作之與操切事若近而用則殊
順情者因人情之所同施而施之若徇情則不顧是非可否
惟人情之是便振作者整齊嚴肅懸法以示民而使之不敢
犯若操切則嚴刑峻法虐使其民故情可順而不可徇法宜

嚴而不宜猛望 陛下張法紀攬權綱刑賞予奪一歸之公
道而不必由徇乎私情政教號令必斷於宸衷而毋紛更於
浮議法所當加雖貴近不宥事有所更雖疎賤必申仍下都
察院以嘉靖初所定憲綱事宜再加申飭庶體統正朝廷尊
矣曰重詔令舊凡各衙門章奏奉旨某部看了來說必重大
機務某部知道雖若稍緩亦必合行事務自酌緩急次第題
覆至特 諭又與泛常不同宜即奉行事近來詔旨多廢格
不行或題奉欽依一切視為故紙至於奉旨應勘應報地方
官尤屬違慢有查勘一事十數年不完年月既遠事多失真

遂使漏網終逃覆盆自若是非何由而明賞罰何由而常整
勅部院等衙門凡奉明旨教日即覆若事理明了即據理剖
斷毋但諉之撫按議處以致耽延其議勘問亦酌事之緩急
道之遠近立限趣報如違限不報從實查叅坐違制之罪然
後人思盡職而事無壅滯也曰覈名實器必試而後知其利
鈍馬必駕而後知其騫良今用人則不然稱人之才不必試
之以事任之以事不必更考其成及備事之時又未必明正
其罪又士大夫務為聲稱舍其職業建白條陳連篇累牘至
覈其本等職業反屬茫然主錢穀者不對出納之數司刑名

者未諳律例之文官守既失事由何舉此所謂名與實爽也
願 皇上慎重名器愛惜爵賞用人必考其終授人必求其
當勅吏部嚴考課之法遵 祖宗舊制各官考滿毋概引復
職濫給恩典洎明開稱職平常不稱職以為殿最至於用舍
進退一以切實為準毋眩名毋徇資毋搖毀譽毋雜愛憎毋
一事槩其生平毋一青掩其大節在京各衙門佐貳官平居
使講究職業長官缺即代之不必另索巡撫官於地方相宜
久或加秩不必又遷他省監司如叅議久即可陞叅政僉事
久即可陞副使不必為小轉之法互遷數易以滋勞擾如此

則人有專職事有責成而人才亦不患其缺乏矣曰固邦本
皇上即位以來凡齋醮土木淫侈之費悉行停革然矯枉
者必過其正甯民窮財盡之時不痛加節省恐不能救伏望
於不急工程無益徵辦一切停免款尚儉素以為天下先仍
勅吏部慎選良吏牧養小民其端潔愛民者上考擢用若但
善事上官幹理簿書而無實政及民者止與中考其貪污者
不必例遣但追贖發各邊自行輸納完日回原籍為氓亦實
邊之勗一今風俗侈靡服舍無制外之豪強兼併賦役不均
內之官府造作侵欺奸徒罔利各衙門錢糧假公濟私皆耗
財病民之大者若求其害財者而去之亦何必索窮民以自
耗國家之元氣乎前催督御史事完即令回京此後毋再遣
重為地方累其屯鹽都御史應否回京別用但責成撫按乞
下部議奏上下惟省事安靜庶民生遂而邦本寧也曰飭武
備邊事久廢屢蒙嚴諭議者曰吾兵不多食不足將帥不得
其人臣以為皆不足患也軍伍雖缺糧籍具存清查影占募
補訓練何患無兵捐不急之費撫養戰士何患無財懸重賞
以勸有功寬文法以伸將權則忠勇思奮又何患無將臣之
所患、因循怠緩姑務偷安雖有兵食良將亦不能有為耳

願 皇上先自治之圖堅必為之志屬任謀臣修舉實政不求近功不忘有事熟計而審行之不出五年可圖矣又祖宗時京營兵數十萬今尚八九萬春秋操練徒虛文耳故事有大閱之禮每歲或間歲季冬駕閱分別賞罰亦轉弱為強之一機也 工褒谷之下部院議行

談遷曰江陵相業見於六事按其言微之靡不犁然舉也他相多敷陳塞白身自負之矣當日首輔華亭之後興化代柄雖皆宿齒好折節禮士於經國實用奚當哉

寧夏把總哮拜邀 賀蘭山後斬酋長九人

九月未朔太僕寺卿董傳策予告

庚戌下廣東總兵官湯克寬於撫按記之時失事被劾
辛亥禮部左侍郎瞿景淳致仕

甲寅徵江南及山西屯鹽都御史鄒應龍凌儒歸其事撫按
江北都御史龐尚鵬總九邊屯鹽如故

盜竊太倉庫金請戶部郎中宋諾員外郎劉自化許自新主
事王宇等定筦庫主事任三年匣三千金

乙卯尚寶寺少卿陸師道予告

前吏部文選司員外郎王穀祥卒穀祥字祿之長洲人嘉靖

進士館選踰月改工部主事移考功署文選員外郎選
法不阿尚書汪鏗嫉之謫倅真定歸養三十年後起倅大名
補南選郎俱不赴善書畫古文詞年六十七

馮時可曰王公跌宕文史不問戶外人以學府目之乃其
辭受進退煇、如此哉末世紛、白馬蒼蠅籠智鼓愚然
多沉酣世味如饑十日享太牢不自厭或黽勉丘園常末
路不自固遂辱北山之遺者何以學為乃公始終林臥澹
若深淵靜若古峰匪殖於學何能然風美傳世重我粉榆
矣

丙辰旌石州故副使喬應光妻蘓氏及其女貞烈並殉難
還故兵部右侍郎曾銑没入田十頃

丁巳都察院裁定入覲官道費監司遠則百五十金近八十
金餘通減

戊午戶部預開明年中邊鹽引

庚申故工部尚書章拯贈太子少保謚恭惠故右副都御史
婁志德贈工部右侍郎謚莊肅

翰林院侍讀學士諸大綬左春坊左諭德兼侍讀張四維主
武闈

辛酉少傅工部尚書雷禮言錢糧奉詔節省太監滕祥仍橫
索不已近傳造榭櫃樂器自加徵巨萬大木圍一大長四大
以上任意斬截用違其材臣力不能爭乞早賜罷上不憚
予致仕禮自土木見拔夙事徐階知衆不容託中官去之
丙寅光懋宋良佐溫純魏體明李己楊一魁許天琦為給事
中張煥李日強駱問禮為南京給事中傅孟春蔡廷臣許大
亨楊冢相崔廷試蘓士潤向程趙煒楊相李學詩孫裔興姚
繼可郭庭梧賀一桂劉堯卿王圻許鎡潘允哲余嘉詔傳寵
為試監察御史楊邦憲為南京監察御史

戊辰兵部覆請大閱許之

己巳總理河道工部尚書朱衡還工部

庚午增武舉百人

起翁大立右副都御史總理河道

乙亥議大征廣東山海諸盜

十月丑南京工部尚書魏尚純卒

戊寅免臨沅鞏昌慶陽夏稅鳳陽淮安揚徐滁秋糧並災故

辛巳論囚總兵申維岳等

壬午月犯牛宿大星

癸未南海知縣詹仰庇為試監察御史

庚寅大風霾

南京織染局內使張進朝詐稱勅採宮女江南嫁娶立盡事聞進朝論死

壬辰月犯畢宿

癸巳裁南京太僕寺少卿之一

巡按浙江御史蒙詔請穿寶應湖月河因近隄民田令計畝受直蠲稅已得旨工科都給事中孫枝言比來江淮諸郡蕭然煩費月河之役請俟有年上是之

翰林脩撰余承勛兵科給事中傅珮被薦各年七十進太常少卿致仕

己亥廢遼王憲熾為庶人徙鳳陽國除憲熾早慧多失行性蕩佚漁色惡少年導之恣為不法以國素貧股削諸朶人自肥諸宗人怨刺骨然自其藩國外無所及民亦安之會副使貴陽施篤臣分察荊州與憲熾相失陰求其罪諸朶儀紛為蜚語白篤臣篤臣轉揭御史陳省䟽聞給事中張鹵各劾之奪祿三之一己巡按御史部光先䟽其罪十三命刑部左侍郎洪朝選等案之具如所言下禮部廷訊以狀工有旨憲

熈僭擬淫虐罪惡多端背違祖訓干犯國紀革爵除封遣
駙馬都尉鄔景和告太廟憲熈臨發上書毛太妃泪濕重函
時人哀之蓋張居正隸王尺籍微時莊王奇其才嘆憲熈昂
如也憲熈不快虐居正祖以酒而死居正心啣之適事發至
於奪國

談遷曰親藩非叛逆不奪國餘即有罪鑄其祿或幽廢子
弟仍守其社 永陵之廢伊王猶為過之今以憲熈當典
橫之罰益非其倫矣江陵憑其私恤幾千乘如振槁予讀
國史蓋即江陵所手定者然指列罪狀當几杖之賜未即

如彼漢成也

錢希言曰嗟予解衣、我、悼之不祥且丞相寧能為石
人耶十年間小山蘭坂鞠為草萊東閣平津亦廢為車廐
斯非天道好還與不然何報施之疾也

壬寅王正億嗣新建伯

癸卯災傷免保定河間真定順德廣平田租

甲辰免河南田租

十卯丁未太原天鼓鳴星隕

己酉免台州田租

壬子宣府總兵官馬芳率叅將劉潭等出獨石襲於長水
敗之。追及於鞞子山復戰又敗之擒斬八十餘人賜金幣
乙卯朝臣考察行堂上官覈注送部院

己未定任子陞官例不堪民牧者得陞太僕丞鹽運司同知
如稱職遞陞左右叅政

庚申陳大紀嗣寧陽侯

辛酉免江西田租

乙丑杖閑住太監李芳下刑部獄尚書毛愷言芳罪狀未明
莫知所坐非所以示天下芳善書慕呂強張承業之名歎直

諫忤旨命錮之

戊辰至日

工親南郊

十 仁丙子禮部右侍郎呂調陽兼翰林學士曾錄副總裁戶科
都給事中魏時亮工三札曰先憂曰養士曰久任吏部覆從
之

辛巳太原靜樂人李良雨化為女

壬午免廣安渠縣田租

癸未兵部左侍郎劉燾為右都御史總督兩廣巡撫寧夏右
僉都御史朱笈移大同

南京協守應城伯孫文棟左府豐潤伯曹文炳右府永康侯
徐喬松各乘輿見劾奪祿二月文炳左贖免諭兩京武臣非
特恩毋與文臣四品下亦如之

甲申立武定府儒學

己丑山東右布政使沈應時為右僉都御史巡撫寧夏

庚寅世宗皇帝祔太廟

諭戶部購寶石期三日尚書馬森言其不辦上趣之科道

工章並不報

癸巳靖江王邦寧嘗因事杖斃其中尉經賄宗人大譁事聞

奪諱者祿諭邦寧睦族

丁酉先是限勲臣五世田百頃戚畹七百頃至七十頃廢絕

及奸冒並入官巡按直隸御史劉世曾報勲戚五世溢田百

頃以上成國公朱希忠千三百頃有奇定國公徐文璧英國

公張溶惠安伯張元善各五百頃有奇泰寧侯陳良弼錦衣

指揮李光先等各百數十頃駙馬都尉李和賜田二千八百

餘頃許從誠千五百餘頃錦衣衛指揮謝守朴林薦張澍陳

書文龍邵輔千戶夏時際等田各千數百頃並宜酌裁恭順

侯吳繼爵豐城侯李儒寧陽侯陳大紀安鄉伯張鑑崇信伯

費甲金武進伯朱承勳寧晉伯劉斌錦衣衛指揮甄輔等田
各不百頃玉田伯蔣榮安平伯方承裕駙馬都尉鄒景和都
督僉事沈至等田不七百頃宜承業其廢絕則興濟郡王保
聖夫人陽武侯薛倫永順伯薛斌故京山侯崔元瑞安侯王
源駙馬都尉李銘焦敬王誼錦衣指揮錢昂蔣秉正等約三
千五百頃有奇其賜田不載冊武定侯郭文誠武安侯鄭崑
彭城伯張熊成山伯王維熊等約二十頃有奇其奸冒若陽
武侯薛倫平江伯陳王謨指揮周世臣百戶郭勇故都督陸
炳等約三千頃有奇宜追奪部議以勲戚當稍優之即冊籍

不載若武定侯等田宜再覈陳書 母后從子准五百頃謝

守朴林薦三百頃張澍二百頃文龍五十頃其廢絕如先世

丘墓在焉則二百頃者量留五頃百頃以下量三頃資祀餘

如世魯言命復議遂定世勲二百頃兼勲戚百五十頃

已亥魯王順坦德王載塏各減祿給其宗人賜獎勅

庚子先祿寺卿靳學顏為右副都御史提督鴈門等關巡撫

山西

辛丑故南京兵部尚書潘潢謚簡肅禮部右侍郎劉瑞謚文

肅

壬寅封唐世子碩曠理府事

癸卯秦府永興王惟耀言祖奉國將軍東櫟榮惠王誠淵從子襲王爵以僭乞釐正 上嘉其自實許本爵終身著為令是年巡撫應天右僉都御史林潤奏江南均糧惟松江未均乞暫設官丈之遂命松江同知鄭元韶進湖廣按察僉事專勅大田凡上御等平米一石准田二畝七分三釐中鄉米石准田三畝一分二釐下鄉米一石准三畝六分三釐其不時加派俱論糧加耗當時使之鎮守貴州右都督總兵官石邦憲卒邦憲世清平衡指揮使

嘉靖九年守備都清平丞寇積功至今官

郭子章曰諸苗桀驁難靖易亂兵不可向邇也久矣石都督東征西伐五十餘陣料苗如神所向皆克為嘉隆間名將予及復公狀播州楊烈助磨子苗公曰吾以安制楊及陳炯杜拯二公圖安問期間兵公委婉詳答其議遂寢嗚呼令安得石都督與籌黔事乎

己巳隆慶三年

正月己朔延綏榆林衛地震

陝西右布政使黃華為光祿寺卿

戊申前南京兵部尚書趙大佑卒大佑浙江太平人嘉靖己未進士授鳳陽推官拜御史歷南樞終養博太和雅至輒有聲晚屢薦不赴

壬子大同總兵官趙守出弘賜堡值一敗之擒斬百有七人賜金幣

癸丑兵部覆巡撫甘肅右僉都御史王翰以令甲邊臣職至二百金戊邊四百金者斬法至嚴也惟論劾無實其罰不行宜刊諾令制律俾論劾者核實正法莊浪土官赴京遙遠待

襲者七十餘人至涼永山甘未降為軍尤可憫也乞代贖聽襲從之

乙卯叙閩廣勦寇功賜金幣兵部請破例先賞後勘庶勸邊臣

總理薊昌保定練兵署都督同知戚繼光上言薊鎮兵雖多亦少之原有七不練之失有六雖練亡益有四何謂兵雖多亦少兵好末技役於將門老弱充伍也邊關少傳舍使者絡繹將士逢迎也倣調無法遠赴不及也達軍邊軍散漫無統也臨陣騎兵舍馬而步也家丁盛軍心離也乘障卒不擇衝

緩備多力分也何謂不練之失諸將不足馭士也火器不善
用也棄土著不練也入衛卒無紀律也畿內班軍民兵四萬
人各一心也武科選將非練將也何謂雖練已益擊射未合
也金鼓旗幟不問也弓矢不力也教練美觀無其實也臣聞
兵法因地制勝薊之地有三平易交衝內地之形也亦險亦
易近邊之形也山谷仄隘林薄翳塞外之形也入平原
利車戰在近邊利騎戰在塞外利步戰乃邊兵惟習馬耳未
閑山戰谷戰林戰之道惟浙兵能之臣發跡浙江思用浙人
有以也請募殺手三千銃手三千合練章下兵部謂薊鎮有

總兵郭琥又繼光練兵權易分請召琥專任繼光上從之
召琥入京改繼光總兵官鎮守薊州永平山海南兵弗調餘
下督撫詳議

丁巳故尚書金獻民潘潢韓士英贈太子少保右副都御史
陳講贈兵部右侍郎大理寺卿湯沐贈工部右侍郎
盜入犍為榮昌

戊午趙州天鳴

禮部尚書高儀等請皇太子出閣就學上徐之
庚申、教千騎犯遼東官軍失利

壬戌魯世子壽鑄薨

癸亥宣府總兵官馬芳以廢干戶辭之贖副總兵田世威叅將劉寶死御史王圻劾芳黨護 上不許

己巳大理寺左少卿王諍言刑官不諳律例引近事一二証之上下部院議諍與尚書毛愷屢辨難 上心是之

辛未設長寧永安縣以惠州之河源歸善地廣割置之

壬申戶部尚書馬森致仕

雲南道試監察御史詹仰庇巡城值醫自禁中出云 皇后遷別宮疾甚仰庇上言臣昨聞道路洙言 皇后移別宮殆

一年抑鬱成疾 皇上略不問如一旦不可諱仰累聖德臣

實痛之願復 皇后於宮時加慰勞有旨 后侍朕多年無

子近移別宮莫安適卻疾耳爾不諳禁中事宥之時仰庇意重譴及命下中外誦聖德焉

甲戌左都御史王廷覆定犯奸條例

二丙子召南京戶部尚書劉體乾於戶部

戊寅 上躬祭太社太稷

禮科都給事中王之垣等復請還 皇后於宮命俟疾愈已卯南京太監邢保侵工費譴成

庚辰蠲西安鳳翔慶陽平涼延安今年田租

壬午宗人府駙馬都尉鄔景和卒贈少保謚榮簡景和尚永福長公主公主早薨先帝召直西苑進表見忤謫崑山十餘年被服儒素及召復時稱引祖宗朝事上多採納戚畹之良也

癸未薊遠總督譚綸請築墩臺三千座臺高五大周二大約住百人階三重預儲芻械若攻垣則兩臺火矢交及計周垣二千四百餘里先其要害築臺千二百後漸加築期三年從之又築邊墻層如齒外出可以下瞰謂之瓦籠城堅甚

不可攻。至其下輒引去又製大礮每發斃敵百人

甲申起郭乾南京戶部尚書

乙酉考課京官

刑部右侍郎鄭世威罷

丙戌開經筵明日日講

戊子停太監閱視京營向三年一遣至是將大閱罷之

庚寅荆世子常冷坐殘賊淫縱廢為庶人幽之泰寧王常浩

攝國事

徐學謨曰荆自江右徙蘄為楚東鄙國體故弱隆慶間自

世子常冷坐法廢益復不振凌夷至於秦寧進封之後更
淫戲媒褻有司齟齬之竟以憤斃頃年功令支子兄終不
得弟及大宗索然不享矣

辛卯趣蘓杭織造太監李佑新織千八百六十匹工部言民
力不堪不聽

癸巳浙江歲造兵器俱徵值

右僉都御史龐尚鵬請止延綏寧夏入衛兵補植薊鎮之木
資障蔽兵部移入衛兵於薊

甲午刑部左侍郎洪朝選被劾致仕尋奏辨勒免

三月巳朔南京工部右侍郎江治罷

西安鳳翔慶陽平涼延安旱饑多盜命賑之

丁未旌周府汝寧王勤秋妾劉氏貞烈初王病殆劉氏焚香
祝天衣單三冬以分王火王愈後王薨氏殉之

改程番府曰貴陽時新移省

定各鹽運司官任三年課竣方叙遷

延慶官軍先後擄斬百二十七級

巳酉存問前戶部尚書方鈍南京吏部尚書楊行中刑部尚
書應大猷

月入畢宿

庚戌進戚繼光右都督前勦吳平功
癸丑外戚賜田如勲臣令有司代徵
甲寅廣西討宜山獐賊破之

乙卯封丘王睦誅薨

丁巳命廷臣引疾吏部覈實毋概覆

戊午設定南縣割贛州之龍南安遠信豐也

故總理河道右副都御史朱蒙贈戶部右侍郎謚端簡光祿
寺卿馬理贈右副都御史並予祭葬

庚申起趙炳然太子少保南京兵部尚書兼右都御史

南京兵部右侍郎吳百朋為刑部右侍郎前太僕寺卿董傳
策為南京光祿寺卿

辛酉故貴州總兵官右都督石邦憲贈左都督

壬戌翰林院侍讀馬自強為司經局洗馬署國子監司業

廢靈丘王鳳鏞為庶人以淫刑戮死曾叔祖宗人某相訐脅
斃之懼禍殺中官某抵飾

甲子故戶部左侍郎孫禴贈工部尚書

金星晝見至丙寅沒

丙寅給事中王之垣溫純龍光御史王圻請吉除之日延問
群臣報聞

丁卯通政司右通政趙灼疾去李遷補南京兵部右侍郎
巡撫貴州右副都御史趙錦為大理寺卿巡撫鳳陽右副都
御史方廉為南京工部右侍郎

故兵部尚書丁汝夔右副都御史呂經吏科都給事中董進
第兵科給事中程輅浙江道監察御史王三聘戶部郎中劉
爾牧大理寺評事杜鸞山東按察副使陳大剛並復官
戊辰海盜曾一本導倭陷廣東碣石衛初雷瓊叅將耿宗元

素嚴馭聲言誅敗將周雲翔廖鳳等聞之大懼殺宗元於武
場脅通判潘槐與盜合槐尋執廖鳳以獻 上奪總督張瀚

一秩

庚午定各藩支子不得襲爵著為令秦府隆德王敬鏐襄府
安福王載堯襲久仍許嗣

土星逆行犯太微垣上將星

雲南總兵黔國公沐朝弼有罪免子昌祚攝事

辛未湖廣平溪衛大水壞田廬已災

景寧王載燦坐蒸恣廢為庶人

壬申左府懷柔伯施嵩卒

四
月亥故戶部郎中楊淮刑部郎中魏應召太平知府謝黃監
察御史胡瓊各贈太常寺少卿兵部司務李可登贈光祿寺
少卿

刑科都給事中沈束為南京通政司右通政

故戶部尚書李士翱南京刑部尚書顧璘兵部左侍郎劉源

清刑部右侍郎王啟巡撫河南右副都御史維昂延綏右副

都御史張問行給事中錢薇沈漢安磐王科陸粲御史潘壯

謝瑜並復官予祭塋贈士翱太子太保源清兵部尚書昂

部右侍郎薇漢磐科粲並太常寺少卿壯瑜並太僕寺少卿

丁丑黔國公莊租歸有司徵給

庚辰趙孔昭為戶部左侍郎兼右僉都御史總督漕運巡撫

鳳陽王諱為右僉都御史巡撫貴州並提督軍務

辛巳顯陵神宮監左監丞李祿成孝陵縱從子盜陵木也

癸未總理鹽屯右僉都御史龐尚鵬以歲費及祿糧繁雜不

能盡知乞勅戶工二部冊列簡明題隆慶某年會計錄入覽

下戶部議聞

徵太倉三十萬金戶部尚書劉體乾言其匱不聽閣部科道

各沮之諭進十萬金

甲申選宮女三百人

許吏部侍郎林樹聲養疾不赴

巳丑鄖陽縣大水

套綽力兔小黃台吉等牧河東揚言寇掠寧夏總兵雷龍

等自興武營出塞襲敗之斬百十二級捷聞進總督王崇古

右都御史龍署都督同知餘陞齊

庚寅司禮監太監滕祥奏汰工匠二千四百四十人

辛卯起游居敬南京刑部右侍郎王之誥兵部左侍郎協理

京營

開湖廣竹筒河分漢江之勢

乙未釋輕囚

南京國子監司業周怡為太常寺少卿提督四夷館

丁酉會寧王真潤薨

庚子傳制隆德王敬鎔嗣秦王安福王載堯嗣襄王朗錡嗣

韓王常澹嗣恭寧王壽鈔嗣陽信王焜熿嗣唐山王讓權嗣

慶符王

酉陽苗龍得鮓等作亂銅仁守備謝崇爵擊破之

五朔午兵部議京營訓練

丁未 上憫都人僉商之累特諭寬恤聞者快之

改鑄南京戶部鹽引銅版

戊申翰林院編修王錫爵為南京國子監司業

辛亥故工部郎中岳綸贈太常寺少卿先朝建言廷杖卒

平山大安峒盜平盜出掠海豐渡河總兵郭成適至值南贛

巡撫張紳所遣叅將蔡汝蘭共趨大浦入於平山夾攻月餘

擒斬千三百七十五人叛將周雲翔突圍走成獲之

壬子提督太和山太監柳朝乞留香稅四千三百餘金葺宮

觀許之戶部尚書劉體乾言稅不止此請歸之有司如太山

例忤旨奪俸六月

癸丑延綏口北馬營大雨雹殺田禾七十里

北京屯田御史併於印馬

甲寅雲南道監察御史詹仰庇言臣覈內官監錢糧如各庫

厰及房租地租一切糜費輒指御前供用陰入私橐歸過朝

廷乞部科覈出入多寡之數以杜奸欺又人君奢儉繫四方

安危 陛下前取戶部金臣謂充內帑備緩急乃盡造鰲山

脩宮苑藥闌龍鳳舡鞦韆架櫃盆之費俾群小乾沒累聖德

不小伏望念生財之有限思國計之甚艱近侍逢迎玩好者
悉罪斥之以彰聖斷忤旨杖之百削籍裁各監局科道

談遷曰詹侍御請慰問中宮則宥之裁抑近侍遂逆鱗
之批也豈非瑞勢既盈倚為奸利雖軒龍之愛弗如也在
床在旁戒之哉戒之哉

丁巳存問前南京吏部尚書王學夔南京刑部尚書陶尚德
戊午閣部科道各救詹仰庇不聽

辛酉禮部儀制郎中戚元佐上言國初親王郡王將軍止
四十九人女財九人今二百餘年玉牒至二萬八千四百九

十二人視國初不啻千倍况十年之後所增寧復幾何又將
何以給之法窮則變臣敢僭擬五事限封爵如親王嫡長子

襲矣嫡庶次子許封其四郡王嫡長子襲矣嫡庶次子許封

其二將軍有嫡子許封二亡嫡子止庶子一請封中尉亡論

嫡庶止封一凡不得封者量給貲賜章服曰議繼嗣親王得

以弟子嗣郡王亡子僅本支奉祠弟子不得嗣曰別踈屬國

制郡王六世孫以下世奉國中尉臣觀祖廟之制親盡則

祗在祖宗且然况於卑屬今後奉國中尉再傳而下不封

長子給五百金餘聽自便曰議主君郡縣主及郡縣鄉君給

祿外其選配儀賓既有誥秩足為榮寵免給俸各女或不盡封仍給婚資曰議冒費革爵子女妄冒子女擅婚子女與一切庶人既各治生則口糧可無給曰議擅婚擅婚所生子止賜名不給口糧命下禮部議之
設山海關叅將

甲子戶部預開明年各司鹽引

丙寅宣府雨雹殺田稼

礦盜入婺源縣焚劫

丁卯裁荆瞿兵備道僉事

己巳裁濟寧閘工部主事

庚午禮部右侍郎呂調陽改吏部仍直經筵

辛未上親北郊

兩廣總督張瀚憂去

六朔寅左春坊左諭德兼翰林院侍讀孫鉞為國子監祭酒

裁兵部武庫主事一人

壬午應州雨雹殺禾稼傷人畜

初御用監太監趙遷劾工部主事劉佩違例苛稅擅鬪皇舡事下山東巡按御史至是御史羅鳳翔上言湖州通判仝社

部運私貨為佩所持因嫉遷誣之佩無罪社常反坐而責遷
悞聽從之

前南京兵部右侍郎王積卒積字子崇太倉人

進

士授武選主事便養乞南歷郎中出為廣東左叅議佐勦恩
平積魁憂去補陝西遷貴州威清道副使至湖廣右叅政佐
勦塘西因苗以省試累貶兩浙運鹽副使進僉事副使至福
建右叅政佐破倭擢山東按察使拜右布政轉福建左擢右
副都御史巡撫山東遷南兵右目青乞休性廉靜不露其才
年七十八

甲申大學士張居正以南京刑科給事中駱問禮言大閱非
今時所急不必仰煩聖駕自臣建議後禮官訂儀注科道條
事宜屢勤章奏一旦停罷若四方觀聽何 上是之

滄州蝗

乙酉令各鈔關同府官收稅

薊鎮三屯營地震

己丑起李秋右僉都御史巡撫大同

故南京太常寺少卿夏良勝贈太常寺卿漳州推官黃真贈
光祿寺少卿

乙未駙馬都尉李和卒贈太子太保

丙申通政司右通政海瑞為右僉都御史總理糧儲提督軍務兼巡撫應天

戊戌旌原武王賁櫛賢行

己亥前太子少保兵部尚書趙炳然卒贈太子太保謚恭襄炳然劍州人嘉靖乙未進士歷官三十餘年清勤練達任輒有聲

壬寅吏部文選郎中李世達為通政司右通政提督騰黃閭肱癸卯朔山西旱蝗尋大水

乙巳裁戶部山西陝西貴州司主事各一

南京吏部尚書吳嶽工六事勤召對限輪對容直言崇節儉正題覆復奏執上納之

總督兩廣軍務右都御史劉燾巡撫廣東右僉都御史熊桴請募浙兵五千人為先鋒討盜歲一踐更從之

己酉翰林五經博士孔貞學奪官徙汶上

壬子武定叛苗鳳曆伏誅初鳳繼祖得罪武定知府鳳索林安置鎮城改派官授曆子思堯經歷給田曆失守怨望陰構水西宣慰安國亨謀亂糾衆夜襲武定不克入退走罵刺山

獲之

甲寅裁江西驛傳按察副使

己未登州地震有聲

辛酉番僧違例入貢奪四川署都指揮僉事槐寅等俸各二月

癸亥陝西盜何勉等殺百戶魯卿巡檢黃鸞尋就擒

甲子戴鳳翔陳吾德章端查鐸楊鏐黃才敏邵廉為給事中
李崧為南京兵科給事中蕭廩凌瑄張守約張更化褚鈇俞
一貫武尚賢余希周楊松為監察御史何子明余一龍王誥

為南京監察御史

真保淮濟浙東西江南北大水

丙寅四川妖人蔡伯貫以千人掠銅梁大足等縣尋討平之

七月申朔交城王表相襲兄爵例當奪以自請止爵其身

前南京刑部右侍郎虞守愚卒

初徵光祿寺二十萬金寺臣言庫僅十五萬命以十萬進部
科各爭之不聽

乙亥定文武官卹典

庚辰減入貢番僧賜齋

壬午先是令作懸燈鰲山工部言災異早蝗奏報踵至宜停止興作以應天心即朝殿燈不可缺稍加脩葺該監足辦何至費三萬餘金也 工遂罷鰲山僅脩朝燈

河決沛縣自考城虞城曹單豐沛抵於徐壞田廬亡筭阻漕艘二千餘於邳州諭卹徐沛災民

乙酉戶科都給事中劉繼文請撫按覈有司積穀之數備賑從之

丙戌裁山東曹濮青州二兵備副使濟南兗州同知青州通判各一

賑河間保定廣平真定順德大名

夜月食不見

丁亥脩乾清宮

戊子賑文安薊州遵化遷安災民

壬辰諭戶部發二萬金遣官同河道右副都御史翁大立賑沿河災傷仍酌量蠲免

前禮部左侍郎兼翰林學士瞿景淳卒景淳字師道常熟人嘉靖甲辰進士授編修歷今官學行醇謹氣端勁見貴勢亡少屈年六十三贈尚書謚文懿

沈一貫曰公為文雄渾深美常依於正不雕琢而成尤長於制科國朝二百年推長洲王鏊毘陵唐順之及公而三始沮棄於時心自好不變及遭時妙天下海內學者不敢損益一字師心不阿與聖冥合甚哉似其為人

王世貞曰當先帝之歲甲辰而天下遂無不稱瞿文懿公者然豈能為稱公哉明與大臣之得以文懿謚可指數也而公獨與故儲公瓘其為第一人於甲辰同其謚同其以文行常官慎勤同佐南銓而不及相以下壽終同皆名實彬、君子也夫以瞿公之眇小言天下事勅挺不阿貴

權者寧可皮相也太史公之致慨於留侯有以也

初禮部議裁太常寺協律郎等四十一人檄太常寺卿陳慶擬定不得守師宗記濫奏慶疑其刺譏又祠司不署名為輕乃言典禮繁重宜下部熟計而吏部裁上慶心不能平申明部寺職掌寺非部屬何得擅裁祠司牒安得不署名吏部覆移牒宜仍舊從之

癸巳沐昌祚為都督僉事暫領總兵官鎮守雲南

丁酉脩重城

金星晨見南方

八月寅朔 工祭夕月壇

甲辰前奉化縣知徐獻忠卒獻忠華亭人舉嘉靖
最精博晚富著述

丁未火星犯鬼宿

戊申 上祭太社太稷

兵部左侍郎曹邦輔為南京右都御史

庚戌御日講

裁南京刑部浙江江西司員外郎廣東雲南司主事大理寺
左右評事各一

辛亥諭停刑

寧海王載圻薨

壬子兵部右侍郎曹亨為左侍郎巡撫山西右副都御史楊

巍為兵部右侍郎

東鹿大水免田租

癸丑御經筵

叙平魯一本功進總督劉燾左都御史巡撫福建涂澤民巡
撫廣東熊桴並右副都御史進廣西總兵都督同知俞大猷
右都督福建廣東總兵都督僉事李錫郭成並署都督同知

餘陞廕賜金幣蓋閩廣夾攻賊於柘林澳敗之走馬耳澳又
敗之擒一本斬三千餘級焚溺三萬人俘卒軍中贈兵部左
侍郎

林之盛曰熊公在嶺南其平盜之勛庶几韓襄毅矣然當
時之推轂者江陵也江陵雖攬權然識人才臣畢展其用
熊公之奏績也有以哉

丁巳賑蘓松水災

庚申巡撫遼東右副都御史魏學曾設戰車營於廣寧車二
輛中設拒馬槍塞其隙載槍砲每車二十五人車百二十輛

卒三千人游擊將軍馬文龍領之

壬戌禮部尚書兼翰林學士趙貞吉兼文淵閣大學士直文

淵閣

癸亥賜岷府廣濟王定燮遵訓書院

山西王府各立宗學

乙丑禮部覆科給都事中王之垣御史趙惇疏請御便殿

俾九卿科道大事面奏取決其奏文字務便省覽得旨自後
章奏詞簡明字粗如嘉靖初便殿面奏俟後命

丙寅工科都給事中嚴用和請罷浙直織造召太監李佑甦

民困南京給事中駱問禮亦言之工部尚書朱衡覆如用和
等言 上詰其沽直名以狀對衡引咎乃已

九朔酉總理河道右副都御史翁大立請於徐州子房山梁山
至境山別開漕渠八十里其利有十云云亦有三難工費工
食工程
工部集議行之

吳道南曰古人任事擇其利多害少者猶為之况所為難

兼及於怨謗是豫求為自解地也大臣似不宜如是

甲戌刑部尚書毛愷言災異頻仍由刑獄冤濫其弊有二濫
詞濫拘濫禁濫刑濫擬濫罰 上大是之下中外諸司痛革

其弊

蠲江南北蘆課

丙子 數萬騎犯大同右衛鎮川堡分掠山陰應州懷仁渾
源等命宣府總兵馬芳援之

淮水溢自清河縣至通濟間及淮安城西淤三十餘里決方
信二壩入海又莒沂郯城等之水溢出邳州溺人亡笑翁大
立繪水災圖十二上之

丁丑傳旨宥副總兵田世威參將劉賢死戍邊自贖兵科都
給事中張鹵等言中旨非法奪鹵俸二月

己卯 世廟懿妃趙氏薨

翰林院庶吉士何洛文為編脩

揚州地震

庚辰前南京兵部右侍郎劉畿卒

壬午裁南京戶部廣西司員外郎廣東司主事各一

丙戌巡撫廣東右副都御史熊桴疾罷尋卒

丁亥勅褒晉王新埙潘王恬爔鎮康王恬焯陵川王府輔國

將軍勛讓慶成王府輔國中尉表析學行新埙母太妃尚氏

教王嚴尚太妃疾王叩頭露禱請醫與均禮長史朋教陳善

王輒下拜以時勞賜國中吏士恬爔好學工古文詞妙於聲

律皆宗籥之望也

存問前南京戶部尚書孫應奎年八十

戊子浙西水災賑之免歲餉

己丑廣東左布政使熊汝達為右副都御史巡撫廣東

辛卯 上大閱於京營教場勅諭戎政官及諸吏卒

壬辰總督戎政鎮遠侯顧寰等表謝廷臣稱賀 上御皇極

殿受之

兵部工大閱將領及勲臣錦衣衛官射格第賜金幣襄城伯

李應臣中軍尚銳等在下格寘之

免太倉崇明靖江嘉足溧陽吳江天長高淳六合田租

命建昌臨江袁撫南陽鎮平唐鄧泌陽桐柏專行淮鹽南召
內鄉新野浙川裕葉專行解鹽

甲午念大閱扈從各官賜休沐三日休卒五日

十月辛丑朔彗星見天市垣至庚申滅

甲辰補三大營官軍滿十萬

丙午裁唐府崇府長史各一開封彰德衛輝懷慶通判各一
慶成王知燠薨

免寧波紹興溫台處田租

辛亥長陽王寵游薨

免鳳陽淮揚及徐州鉄麻之直

壬子裁嵩縣叅將

甲寅免山東屯租改漕粟十之五

丁巳太常寺少卿提督四夷館周怡卒未赴

戊午中府署都督僉事郭琥為總兵官鎮守山西并提督鴈
門等關

甲子故巡撫廣東右副都御史熊桴叙功贈兵部左侍郎予

祭墓參將王詔子之野手擒曾一本授指揮僉事世襲餘賜金幣

乙丑湖廣按察使何寬為右僉都御史巡撫福建

丁卯 上省牲南郊

十月甲戌 上親南郊還御皇極殿廷臣行慶成禮年災不宴

但昨之

乙亥初諭戶部問開納及戶丁鹽糧所入之數至是尚書劉

體乾上之

丁丑密雲遵化地震有聲

戊寅錄寧夏擣巢功諸臣賜金幣是秋套吉能屯白城伺

我撤兵入掠總督王崇古聞之檄諸鎮先發各出花馬池長

城抵白城斬百七十七級寧夏總兵雷龍功為最

庚辰南京刑科給事中諸暨駱問禮上十事其五曰公孫納

以廣言路 陛下登極以來詔書兩下皆有諸人直言之條

今除言官與一二名臣外盡付之該衙門知道豈天下公論

果萃於一二人哉而詔書之下又何必以直言為詞也臣不

暇盡數即東莞布衣譚清海所陳三事於國體所關尤重夫

一布衣且然則上此豈皆迂談而不聞採一言興一利謂該

衙門該部知道一也而曰該衙門即不許覆行夫前已不可
矣方今事必面奏嚴威之下非有誘掖鼓舞之術則漫無言
責者又孰肯干冒天威以徒自取辱哉又曰正體統以防窺
竊近因一二內侍有辭免重任之章內外臣工遂生疑懼謂
此乃祖宗所絕無之事彼得窺竊政事則派禍將不小願
朝見之時凡給事左右如傳旨接奏俱用文武侍從而奏不
能盡或一二當傳奉出入者亦以付之不使中官參預以蔽
天職且明詔中官不得復為辭免重任之跡則體統正而窺
竊之漸亦無自而生工怒其妄鑄三級吏部擬南京國子

監學正不允請之

京師地震有聲諭廷臣脩省三日

癸未大同山陰縣地震

甲申脩承乾永福二宮

浙江布政司左叅政王世貞為山西按察使

乙酉巡視皇城御史楊松誦

時尚衣監右少監

黃雄給事中乾清宮間出微子錢而閩兵馬司捕送御史未
決而內監遣趨云駕帖召雄按之亡狀乃劾雄外橫稱詐詔
雄自辨坐松奏事不實擅拘內使貶官調雄南京兵馬司削

籍

四川茶鹽水利合為一道

壬辰山西右布政使柳英致仕御史宋纁稱其賢進光祿寺

少卿

三屯營地震

乙未巡撫遼東右副都御史魏學會疾去

禮部尚書高儀乞休許之

丁酉免順天水災屯租

戊戌改南京刑部右侍郎於刑部

江西按察使殷正茂為右僉都御史巡撫廣西初總督兼巡

撫以古田盜起專節焉

十 二月己亥朔諭輔臣災異頻仍因部院營私傷和令廠衛偵之

刑部尚書毛愷等引咎已尚書吏部楊博戶部劉體乾兵部

霍冀工部朱衡左都御史王廷禮部左侍郎萬士和等乞休

不允

元氏典史張儀改南京 倉大使怨望許吏部文選員外

郎滕伯輪榭私及右僉都御史溫如璋兵備副使何東序真

定知府倖遷狀 上怒下儀法司編管

庚子天鼓鳴

辛丑湖廣布政司右叅政領荊州府事趙賢致仕

壬寅通政使李一元為南京刑部右侍郎

詹事府禮部尚書殷士儋歸禮部山西布政司右叅政方逢


時為右僉都御史巡撫遼東

陝西盜郭孟行何術等皆平

甲辰汰錦衣衛冒濫官旗千一百十五人

丙午起吏部右侍郎兼翰林學士陸樹聲署詹事府教習庶

吉士楊思忠為通政使



五
壽

